

嶺

南

羣

雅

嶺南羣雅

番禺劉彬華藻林輯

李光昭

字間如一字秋田嘉應人諸生著有鐵樹堂詩集

玉壺山房詩話嚴滄浪以禪喻詩有詩不問學之說前人嘗闢其非而秋田詩禪吟一篇持論尤痛快余與秋田一見懽甚自言其少作頗尙奇詭既而悔悉焚之今所有鐵樹堂稿真意沈鬱健筆峻峭卓然絕倫一戰謝澧浦謂其寢饋於百十名賢詩稿佳處沁入骨髓故隨所見聞橫豎說來無不入妙秋田遊澧浦門相知最深良非過譽

水墨牡丹圖

玉堂才子怕塵氛金闕神仙好白雲絢極文章反平淡滿城桃

李自綽紛

古意

河漢分牛女波寒欲渡難信知離別苦不獨在人間

蟬粉夢難銷蠶絲死猶亂安得分水犀坐把江流斷

種竹

未得渭川萬千畝也須庾園三兩竿乞取鄰家綠个个植之花
圃青盤盤不踈不密不凌亂宜風宜月宜秋寒呼童縛帚圍
掃無使塵葉傷青鸞

天寒日微碧雲起恨少亭亭美人倚青猿子規啼蘚花雲夢滿
湘隔窓紙此中寒碧搖瓊瓏使我離憂滿江水明朝抱甕滋靈
根但得平安我歡喜

題畫水仙

自憐生小卽離塵肯逐東風桃李春獨有心香凝一點酒闌燈
盡付詩人

得葉二 兩成書知欲遊閩率占二律以寄

空谷人歸去相思未有涯殘春忽雁到音響一何悲告我窮郊
島明朝遠別離波濤聞海濶風雨捲征旗

所苦幽閨子婷婷太瘦生不才誰似我多病復憐卿
十字子舊贈內人句
舊句吾猶痛長途君不情淚痕紅點滴照眼海棠明

贈楊秋衡

炳南

紅燭光中忽掉頭華林元圃誓冥搜登山不到崑崙頂那識黃
河萬里流

商婦琵琶圖二首

錄一

紅顏多少歎漂蘋知已千秋不數人如此琵琶如此曲潯陽江
上老風塵

寄呈溫謙山舍人

汝能三首錄一

巖野老孤貞匡山月並明著書傳後死壽世得先生舊冊搜兵

火空堂弔雪聲都歸梨棗下遺恨一時平

時搜刻陳巖野雪聲堂殘集

九月二十二夜月

半面輪虛掩孤光若畏人深宵纔一見不寐得相親水氣侵樓閣花陰肅鬼神紅塵大掃淨誰是汝前身

李半崖畫竹賦贈

秃筆掃縱橫天風紙上聲離披數枝竹公自寫平生苦節竿竿接青山个个迎林泉無肉食寒瘦莫相輕

書圓溟山人集後

布衣亦足玷騷壇白雪樓中起暮寒此地雲泥揮手別當年風雨對床歡一生俠骨高王李五字長城逼杜韓驟與盧枏脫幽獄山人名已動長安

慈親

慈親憶遠人遠人憶慈親誰知遠人思不及慈親悲高堂未暖
席乃復倚門側高堂夢關山覺亦在眼前高堂夢雨雪親骨忽
凍折

寄楊秋衡

寥落看吾黨君猶古道存我從離別後辛苦北堂萱獨恃雲霞
契能推骨肉恩勸餐還問病勞汝幾晨昏

送別子健弟還里

旅食共關山津亭撇手難昨宵風雪緊雲裏雁聲寒

昨夜

些些睚眦莫相論尙有壺殽未報恩昨夜空堂坐彈劍一天霜
月淡羈魂

贈溫虛齋上舍

汝政二首 錄一

聞說東樵是舊遊夢魂隨汝駕靈虬何年左股來蓬島子夜陽
光動石樓前導肯容塵世客孤吟能破洞天秋酒田明月花村
樹尙有尋香願未酬

偶題

汝曹原自愛身名萬古江河欲與爭修到秋林作蟬噪也須風
露飽平生

龍山雜興次謙山舍人韻十首

錄三

松閣夜颼颼欄杆一月高身疑出雲海夢亦聽風濤勝地已如
此客形差未勞關河得棲息書劍罷遊遨

今古千秋聚龍蛇萬筆奔搜羅經歲月快摘莫爭譚忽自舍孤

詣何能證九原肝腸爲詰曲耿耿到黃昏

謙山有詩文海二選
平爲參訂

樵峯七十二指點傷斜暉昨夢曾飛度白雲沾滿衣來遊愁路

隔覓伴恨人稀忍作無情客揚鞭背汝歸

梅花書屋圖仍用東坡松風亭下梅花韻

萬樹積雪不見村萬花罩樹遊花魂萬花魂中一茅屋一人獨立當黃昏東林銀蟾佇未上已有白毫輝滿園琉璃世界眾香國扶上春臺雪亦溫人迎花魂花迎人翠禽不用催曙嗽撚髭叉手若有得好句定壓僧敲門渠在箇中忘畫裏但好與花同笑言我從空寂悟聲色已盡床前酒十尊

天上謠六首

錄四

天上琅函溯古初人間空自注蟲魚扶輪承蓋龍鸞接修到神仙好著書

白玉樓扁特地開嘔心詞客踏雲來廿年仕進遭讒鑠不道神仙愛宦才

曾看星象識天錢
入穀天倉列次躔
大抵神仙都富貴
碧霄終有雨珠年

笙簫對對作鸞鳴
盛地人傳白玉京
若使嬭娥私步到
五城一夜變愁城

可憐妾

郊行見墓碣鏤可憐妾墓不紀代朝亦無姓字知有
隱痛苦難求也偶記軼事強爲題之曰可憐妾

花爲側生枝採摘甘後時可憐棄荒園不耐風雨摧咄咄某氏
女十載藏深閨孤琴時自撫願得心相知相知一朝得爲聽媒
妁辭有美出裙屐年少翩翩姿風流邁時衆亦頗工吟詩司香
與滌硯願得名門姬大婦亦靜好待人謙以卑妾心尙皇皇父
母先許之金珠餽吉旦花轎迎蛾眉父母出門送涕淚含淒其

得上君子堂花燭侵郎輝凝眸一却扇果獲瓊林暉大婦閉高
閣微言出重帷叩門目請謁稽首百不開屈身苦承順忽忽三
月來本無小過失亦或施詆訾漸欲加鞭撻不恤膚凝脂郎前
少排解怒益不可支當空出飛棒體血飄淋漓置妾幽邃室有
若防軍機旁人那得勸侍使莫敢窺郎君一書生弱質難撐持
雄風久不振畏此司晨雞側聞聲欲獻乃是郎君啼只隔牆一
尺不得親容儀又聞妾父母痛妾失所依終宵兩老淚對泣孤
燈微老母一痛死之貞桐棺貲煢煢白頭父露草當垂危悲親
復自悲風雨爲之淒子立弔人影行歌有所思歌成可憐妾願
寄郎君知不敢怨父母父母終愛兒不敢怨媒妁脚跟前繫絲
亦不怨大婦業緣方在茲但覺妾可憐可憐堪告誰今生且已
矣來世未可期孤墳築三尺名姓不必題直題可憐妾留作斷

陽碑

靜夜吟

蕭蕭瑟瑟打牕戶是落葉耶是夜雨開門微月隱花圃樹影如
人向風語壁燈半含還半吐玉漏沉沉報三鼓

憶陰那

奇文秘石室惟待好奇子吾不能讀書所好山水故鄉有陰
那亦可羅浮比千巖敷雲映萬壑滴石髓人家半烟霞樵徑雜
紅紫瞿曇不一菴鐘磬答彼此神禽吟風來大蝶鼓花起堂堂
神仙都目不給賞視如何冥洞天終古不到爾程鄉本僻壤此
地復幽詭埋藏亂山中詞客少至止人從塵外看略見峯五指
一徑穿雲行紆迴三十里

夙懷陰那遊涼愜趁秋季獨行無導者黃葉惜滿地問樵乃得

徑聽磬始知寺尙人雲幾層一僧寺門伺入門領禪香出門踏
山翠鐵橋通船窩仙樂忽飄至上有空濛天萬斛珍珠墜月湖
轉桃源別具清冷致晚風何蕭蕭吹我骨節利月出始歸來與
僧同一醉尙想巖壑奇遊仙通夢寐

始遊在甲寅繼遊在乙丑相去十餘年相思亦云久維時正仲
冬覓伴得三友一路風日和送我到林阜陰晴忽不常雨雪墜
空陡三日扃僧窓紅鑪煮村酒稍晴得出門寒色滿巖藪十圍
溜雨栢似欲化龍走回來丁冬泉亦作澎湃吼香鑪裊餘烟飛
掠白虎首忽有霜禽啼驚坼梅花口枝枝盤鐵石剪剪皆瓊玖
花笑當風中我吟出花後此遊雖異昔酒落亦堪取如爲郊島
詩骨立期不朽雖然近寒酸彌得淨塵垢

得家書

兒女念行客涼風歸燕初言旋黑貂做轉畏讀家書

擬閨情

昨得羊城信沿江寇盜多不歸還自得且莫近風波

蔬圃

夜茹圃蔬回味甘曉行蔬圃春潭潭風香乍欲鼻觀撲露碧忽
與芒鞋黏幼兒隨行覓花朵荆妻亦出提筠籃青蔬滿地任多
取莖長葉大吾尤貪冷厨急促熬新火至味止許和晶鹽寒酸
未失名士氣鼎烹吾怕侯門淹此蔬也充下酒物明來吾欲留
清談此圃荒荒了不俗棘籬苔砌青茅簷吾家數世一墨守主
人樂與妻兒兼君不見金谷園花足富貴再來滅沒隨烟嵐

家中餞別作

深閨看月雨迴圓會苦離家過二年海國風波沿路怕粵臺騷

雅待人編編詩山舍人紫薇花圃猶虛席綠水春江更放船最
不成歡今夕酒母妻兒女饒華筵

柔桑

柔桑橫側插河津吹轉東風萬葉春接葉四鄰紅雨樹提籃一
箇綠鬟人鶯啼弱幹催金剪雷轉空山走玉輪滿箔饒蠶難告
語幽懷不與使君親

與廖石坪赤驂

大雅不作詩城毀龍山先生孟春死孟春我來今季春不唱蘭
陵唱蒿里蒿里而今亦未唱幾欲延吟腸斷矣湘帆喜與聯床
吟一病闌珊扶不起兩日前村訪心海仙鶴雲遊無定止得攬
虛齋候石坪容顏慘戚非前似一卷新詩爲悼亡墨花點染啼
痕紫伉儷情深未忍分教余却憶紅蘭氏紅蘭女子病娟娟鎮

日藥烟薰鬢髮生離氣已盡英雄死別情應泣神鬼君悲死別
在衾禱我悲死別惟知已四年互唱千吟章吹散東風成墓紙
墓紙火滅青烟飛九十春光一彈指龍山先生杳何在吟壇幽
幽靜如水君亦梁園舊賓客未可無情古君子明日孤墳作寒
食梨花白楊剪素綺與君痛哭龍山頭上吊精靈及箕尾

過謙山舍人墓

白骨青山誰免此雲車風馬公何駛駕人層霄杳不卽墜地星
精人蒿里黃土沉沉閉玉棺此山獨出塵氛裏四圍山影壓吟
肩去年我公常曳履上有先人馬鬣封哭拜松楸淚花紫先靈
遲公公竟去補向泉臺爲孝子我欲從公覓聲影孤狸嘯風翁
仲峙青山靜立行雲間怵殺紙錢人送死嗚呼萬事東流水幸
爾詩聲滿人耳

詩禪吟示同學

喻詩以禪始嚴氏作詩能令佛天喜但云水月鏡花似滄浪且
未知禪理浮光掠影下乘禪積健爲雄真種子或疑象教主空
寂大雄何以標宗旨佛生已具不凡骨勵行焚頂還燒指九年
面壁絕見聞大千雲遊豁目耳尋師渡海立枯槎毒龍饑蛟迎
角齒祇憑佛力千臂健得破禪關百重時亦如詞客攻詩城嘔
出心肝渠乃已此後乾坤頓軒豁大光明鏡開塵裏一莖草花
丈六身火目珠眉瓔珞體摩喉八拜獅王迎金剛攔門夜叉跪
琉璃宮殿七寶塔富貴奚啻王侯擬羽葆幢幢天女招雨花四
散紛紅紫旃檀初熟震鐃鼓白虎蒼龍作人起廣施法雨潤人
間四海蒼生迴槁死誰云佛法大縹緲我見其才絕雄偉俱由
苦海浮航來盆火栽蓮蓮結蕊世儒爭取詩喻禪曰非關學言

非是片時妙悟生風旛露電流光寧久恃天聲風雷人嘯歌天
色雲霞詩藻采波瀾壯濶氣崢嶸化爲崇山兼大海觀其下筆
如有神豈識鑽研遍圖史卽詩卽佛妙從心爲苦爲甘難告爾
十年孤立擢胃腸一日長歌泣神鬼

題碧血錄

明畿震震搖屋柱天上人頭墜如雨帝如醉夢烈肝碎燕客埋
名入馬圉馬圉中藏矯矯龍狗璫正肆眈眈虎黑獄陰森比夜
臺六君子共刀山聚追賊日迫肉糜爛銀鑄聲中歌激楚臣生
倔強死艱苦兩旁奴隸俱笑汝一人不笑淚簌簌仰看白虹貫
晴宇謂六君子碧血誠可與萇宏照千古橐中紀事紀言筆拔
揮紙上嚴于斧斧亦尋加委鬼軀六忠帶血朝皇祖嗚呼人變
極天變燕客雙睛炯如炬客無名姓有心肝信史編成血光貯

昨夜窓燈搖碧花開編宛共冤魂語

賣蔗童子歌

天啟璫禍李侍御應昇就逮緹騎涸涸士民憤擊一
賣蔗童子提制蔗刀從一肥尉後轡其肉飼狗惜史
書不傳其事李子爲作是歌

童子昂藏無七尺蔗刀氣忽干霄白甘蔗失時變黃蘗虎猴遍
地求人食李家侍御江南傑陷入囚車驅道側萬人聯雲呼殺
賊諸尉禿魂竄荆棘童子尾隨一尉行看然奏刀驚霹靂片肉
擲地含羶腥狗尙遲疑不欲吃此童此事足千秋國史無傳野
史得五人墓道薦馨香誰配童祠供血食

聞陸春圃明府

樹英

遊羅浮寄詩以贈

四百三峯任汝行會輕一萬五千里路窮絕漠流沙地詩老陰

山畫角聲

春園會讀伊
翠作詩甚壯

半世風波歸告我前秋霜月伴談兵孤

筇更上羅浮策憶汝雲中吹玉笙

懷吳同岑

鰲

同岑傲岸不羣所如失意少作有五湖空濶大無處
下漁竿之句以此知名竟成詩讖遊西粵十年不返
聞其放蕩如故其好友朱玉亭林信詡輩或病或死
光景不堪作此代柬

一壑一邱堪釣遊垂竿何必五湖秋乘風破浪孤舟險彈鋏無
魚獨客愁詩句識成吾不忍鬼門關僻汝能搜朱冲老病林逋
死君自蠻鄉歎白頭

新闢海聲堂祀吾粵詩人曲江下至二樵二十六位歌
觀海世人于海色我耳頗聰無閉塞雪浪銀瀾珠貝宮水仙一

夜鳴金石驪龍起嘯鯨鯨奔浩浩天風搖硯北我時研朱點聲
詩粵人殘編倍珍惜得廿六賢于千百曲江先生首出特風人
雅人無不可亦有牢騷近楚客海立雲垂見筆力總是性情所
流液我方諦聽其心聲海聲與之相蕩激心聲海聲塞天地是
一是二叩冥寂羣靈彷彿海上來弟子北而拜奎壁元精耿耿
照斐几寶鼎烟青燭花赤昨欲追公無羽翼今得羣公現靈魄
擘窠大字寫海聲公其降監畫堂側嗚呼公監畫堂側肯借波
濤驅筆墨

寄懷黃香石明經

培芳

故人吾愛老香石流水行雲其性情風浴幾偕詩弟子飛騰能
上大蓬瀛羅浮古是海中島鐵笛君吹天半聲一歲峯頭一來
往花村蝴蝶慣相迎

南園羣奉泰泉師八世吟孫守一祠
粵客何來狂瞽說生平不
讀嶺南詩未窮海水兼天岸
誰撈珊瑚掛日枝近關騷壇祭才
鬼期君相與拜霸旗

走馬

走馬平原得意無乘船憶昨寄江湖
天清尙有風波恐月黑曾
聞盜寇呼到岸蓬壺在人世
據鞍駑馬卽龍駒萬花叢裏揚鞭
過更向長林一挽弧

一牧頻來笑未休謂余馬背穩如牛
眼花落井非仙趣詩草盈
囊足古愁百代風騷幾延頸九疑雲
雨不迴頭縱然欲試煙波
浩只向漁郎覓釣舟

安期巖

雲海蕩神山不知在何許癡絕秦祖
龍悞聽安期語千年皇帝

來我待蓬萊帝豈千年人神仙將戲汝當時七雄強孰敢萬
乘侮良椎與軻劍力盡嗟何補陡欲褫其魄與之談島嶼虛無
縹緲間若有金丹聚漢武蟠桃春一樣空延佇後來徐市船果
觸風波怒皇衷日恂恍山鬼華陰詛帝速鮑魚腥翁爲雲霞舉
嶺表有桃源不莅秦朝土卓立白雲高南天一支柱四百羅浮
峯遙遙蔽門戶陰壑流神漿陽崖廝鬼斧鸞車忽東臨峯腰開
洞府五老騎石羊迭爲翁賓主漏天飛濤前自顙菖蒲茹偶躡
摩星巔一鶴軒軒舞迎翁赴帝觴空際鳴簫鼓秦宮歎劫灰漢
殿悲離黍獨有安期巖靈光照今古我無祖龍愚生不求化羽
但念茲山幽欲追三庚暑縛冠冒日赤藜杖凌邱阻風磬飄冷
冷瑤宮宛在覩香龕拜烟篆檀像欽眉宇退賦望仙謠晴天答
涼雨

下榻倚山樓卽得五十六字書于壁

樓爲葉雲谷廬墓地

高樓分得一檐楹早有山僧煮茗迎孝子昔年廬墓地騷人今夜讀書聲魚龍雲海吞三島星斗藜光照百城想到霓裳大羅詠神仙當不廢詩名

鶴舒臺故址

白雲黃鶴句千秋崔灝題詩上有樓一樣神仙爲羽化當時臺榭壯峯頭地遺賸蹟饑饉鼠花落空山杜宇愁誰事誅茅新紫府尙能銘石走青虬

寓倚山樓見樓下流雲似水樓浮浮欲動題其額曰雲船爲作雲船歌寄贈樓主人葉雲谷

飛樓傑出千層嶂下有流雲學波浪天風吹樹助濤聲茲樓浮浮若虛舫我啟琉璃六扇窓海天空闊襟懷壯倏而雲靜波亦

恬一杭已與神山傍
神山仙人何跌宕
乍停鸞鶴樓船訪瑤姬
鼓瑟金童笙我時
自把新詩唱字字心聲語語騷
神山仙人淚
悽愴曾聞伯牙上蓬萊
萬里危瀾一船邊
援琴乍譜水仙謠
烏啼木落添惆悵
我詩不減水仙悲
我船宛在蓬萊放
幸無龍樓及鯨吞
平安直到青天上
詩仙漁父我兼名
貫月摘星人並仰
獨怪茲樓誰結創
雲谷先生有神匠
知汝樓脩五鳳才
濟川作楫雄疇抗

憶庚午同遊白雲諸子

冰天雪窖老虬鬚
萬里歸來匹馬孤
尙有雄懷納山海
酒酣彈

劍唱鳴鳴

陸春圃
青山山外海
春圃前遊有句云樓外
一時奔注入胸懷

一卷韓詩腸胃撐
瓣香薇露十分清
等閒犖确行山石
便有黃

昏到寺情

徐又白

才華曾與萬人看，望斷青雲一舉難。
細數平生幾知己，倚山樓

上月輪寒。

李東田

白雲一逕到天平，知汝芒鞋歲幾行。
花裏文禽盡相識，員吭爭

欲和詩聲。

黃香石

九龍泉歌

青天飛出九白龍，角牙耀日鬚捲風。
下地倏化九童子，丁髻並揖安期翁。
安期坐呪石，壁裂童子走竄巉巖中。
須臾洞口隱龍叫，四山草樹陰濛濛。
呼龍不見見泉吼，迢迢尙作銀鱗走。
怒時還恐上天飛，童子夜驅雷電守童子。
守土垂千春，往歲爲霖茲九有。
皇帝賜祭嘉神功，七尺龜碑篆蝌蚪。
我來瞻拜龍早知，晴日曖曖祥風吹。
今晨有雲作之而繞我，畫棟蟠我帷。
去時白鰲一條練，忽入隔山松樹圍。
我隨行雲得流水，謂是九龍之所

遺爐烟沉沉，肅宮殿。水光澹澹，明鬚眉。

倚山樓卽目

天海浮湯湯，收入一樓裏。樓窓啟六扇，客思超千里。最宜海日晴，瀾濤掣金紫。風帆水上浮，只作輕鷗視。海雨欲撼樓，海雲深結壘。未雨先有風，松花打窓紙。飛龍載雨脚，並挾雷公鼓。樓前萬松鬣，與龍相角抵。倏忽天宇清，晚鐘送斜晷。前山暮雪碧，後山餘霞綺。迴首涼蟾生，驪珠吐魚市。世界琉璃鋪，我心光明似。便御冷然風，空中追列子。

合見亭

高崖壓空際，一亭獨支撐。下視萬林木，時爲搖蕩聲。其旁石礪角，勢欲摧欄楹。我來甫延佇，已使遊魂驚。

魂驚條以寧。亭靜覺不動，萬木團綠雲。冷光射虹棟，風來鳥語

輕露滴松花重仙人恍見招雲裏騎青鳳

滴水巖

無風疎疎響杳杳有風急雨鳴松棚無人露珠結不墜人來空
際投瓊英人行深洞靜悄悄巖上倒作拖鞋聲積流成池鑑人
影鬚髮下數條條明仰視孤崖鐵壁立旁有萬仞天梯橫我窮
泉源到其頂一橋飛歷巖巖平久聞石鐘不見鐘何有人至鏗
然鳴惟我長嘯震林木巖下客作風雷驚巖泉想亦亂飄洒客
袂淋漓寒不行

韻南羣雅

番禺劉彬華藻林輯

彭泰來

字子大一字春洲高要人謫生著有詩義堂集

王壺山房詩話此年賓客前輩來藩吾粵一賜操奇觚者咸以詩就正賓客前輩虛懷折節多所許可如彭春洲者皆其所心賞也余久耳春洲名而回至端州未幾一把臂共詩集亦未得見茲從方伯署齋借得兩小紙錄而存之天才雋雅吐屬不凡以此知青萍結絲長價於薛卞之門良不虛也

郡城寒食

小雨暗寒食離人正倦遊
濕烟吹不起深樹黯如愁
春燕未歸壘春花應滿樓
無書問徐淑換酒鷓鴣裘

秋胡行

青青陌上桑上有連理枝
纖纖女兒手采采陽春時
彼桑生有

枝征夫亦有歸三日爲君婦五載守空閨上有白髮姑下有黃
口兒翩翩白面郎走馬臨大堤黃金雖云重素節諒不移君心
懷中金妾身水中泥水清石鑿鑿石出不可磯妾有簿上蠶未
作機上絲谷風陰以雨姑老寒無衣無衣姑體寒無婦姑心悲
征夫悔有時逝水還無期可憐靡蕪女苦致殷勤辭

仇十洲百駿圖歌

丈夫不展千里足空向黃金臺下哭驂駟掃盡雙管禿千里拘
來歸尺幅仇生畫馬挽有靈神駿百匹傳丹青曹韓李趙死已
久縑素一拂時人驚千金駿骨尙留意對此縱橫生意氣渥洼
何代無奇才邊陲此日方多事紫燕烏騅昔何往照夜飛黃老
不至沙苑離離秋草荒鴛鴦死華軒旁瑤池路遠天閨隘不
見神駒空見盡平川淺草楊柳橋迴立汗漫騰驤驕別有真龍

墓不得塵沙慘澹風蕭蕭開元四十萬匹馬不信寫真材盡下
園人太僕者爲誰羅帕銀鞍無乃寡卽今百匹何權奇空付人
間老畫師請君更畫嫋姚與伯樂汗血連鑣出沙漠

贈何秋客

陋儒俗舌如螭蜩眼失五嶽爭秋毫六鼃負山蟻羣笑鴛鴦摩
空鵲鴟叫先生卓犖文章雄仰天吐氣成長虹家無半畝膏萬
卷俗眼已白君猶窮隋珠和璧無人賞抱月判花聊跌宕一領
青衫苦不辭千里霜蹄誰掉鞅去年訪我逢端陽論文抵掌浮
蒲觴談深警欬起風雨虛空颯沓搖燈光酒酣不覺露雙臂欲
言不言先下淚當年兩親先後逝刳體再三作甘餌兒心先與
體俱碎兒體已殘心不遂毀傷何事孝何事此時何時何暇計
擲刀捧臂嘯向天片肉隨親同入地先生至孝傾人寰血性偶

露文詞間誰論狂花與客慧如指糠粃儕邱山蓼莪吟哀我何
怙我對先生我心苦驥尾龍頭敢比數吐我崢嶸代君語知音
者誰在千古

宿龍華寺聽蘇荆樓琴

燈影一龕寂寥寥絕物踪江聲流夜枕山鬼嘯寒松學道故人
子彈琴雲外峯客懷清不寐愁絕五更鐘

夜聽秋客琵琶

日暮風吹雨切切琵琶語四絃淒復清雨止浮雲停長溪溪水
自日夜高樓悄悄無人聲玉關萬里明如泣一聲中斷悲風入
水車鐵馬邊音寒奇氣一洗儒生酸胡琴擊碎餘雙手鐵撥鵝
絃偏不偶齊門挾瑟吾曹醜何當匹馬西涼走胡姬笑勸蒲桃
酒石破天驚一搔首

綠珠

花弱不勝春
花飛已作塵
看花滿眼淚
愁煞息夫人

麗華

桂影琉璃脆
嫦娥夜夜心
胭脂一井水
不似汴河深

絳仙

雙果出金閨
歡心怨馬蹄
裙裾春草長
不墜玉工妻

朝雲

春草六如亭
年年瘴海青
小桃園裏住
猶自感飄零

虞美人花

楚雲何處美人家
碧血殘脂染此花
知否青衫南越客
年年空

弔素馨斜

捉搦歌二首

寶刀在鞘不爲利良玉在山不成器男兒二十不稱意誰能伏
櫪作老驥

猛虎食人不得飽鷄子飛天驚嘴爪黃塵漲天卷白草十萬健
兒此中老

小步

小步春郊雨濕衣楊花飛盡楝花飛離人不覺離家遠翻勸春
風緩緩歸

攜慧兒上先大人墓

有婦不識翁有孫不識祖不見抱孫人空指一杯土奠酒墓門
前墓中亦悽楚松楸颯颯風吹雨小鳥啞啞老鳥語小鳥反哺
爾勿啼紙錢飛盡抱兒歸

遊仙

明月緱山第幾峯金芝石髓養清容吹笙鶴背年雖少已歷滄
桑劫萬重

三十三天天外天七籤雲笈少真詮淮南雞犬多如許也立雲
蹠號列仙

青鳥含花雪滿身瑤池清冷不知春丁郎自主芙蓉館却遣瑤
英竊嫁人

詖蕩天門九扇開五雲班裏盡僊才玉樓若作脩文地須向人
間索記來

題嶠雅

側身萬里竟無歸淚滿南雲望九疑此日天家歌燕子重華何
處更陳辭

冰雪仙人見藐姑遠遊心事七絃孤青琴一碎南風歇地老天

苑屈華夫

卷下 牙

靈洲山謁蘇文忠公像

孤峯樓閣開雲關晴江下繞如碧環海上仙人偶遊戲笑移浮
玉來鼉背騎鯨一去百千春幻影依然鴻爪寄側身西望岷岷
高長吟大海生波濤中原地狹留不得天教南國開風騷當日
何人臨賀送作意遲回道山輜東南西北此身存四萬八千塵
劫弄故將調語託前生公詩有前度他雲之語孟嘉言十九耳誤爲癡人說清夢
君不見玉帶曾將換衲衣悟根明示箭鋒機妙高臺上一長嘯
蓬萊水淺公其歸矣山在江心今嶺南桑田矣上亦有妙高臺焉

雜感

大風吹鳥巢衆雛一朝墜嚴霜中夜隕哀鳴展兩翅天地豈不
寬何者爲我寄堪嗟羽翼短未識鵬臬意桃李不同根枝葉鬱

相庇傷哉豆其詩千春爲流涕

落魄蘇季子一旦多黃金
交涼世應爾乃動君子
心君子自有心青琴自有音
白華可喻潔邪蒿重防淫
荷無蹄涔淺安知滄海深

春寒

珠薄玲瓏春不捲牡丹紅
綳胭脂損畫屏八尺青玻瓈
寒影薄人春夢短樓東
姪姤楊柳枝纖臂無力東風知
粉痕淚濕寒玉怯朝來小病
愁更衣錦幔深深夜香重
角枕無情損釵鳳繡衾一半
冷於人七十鴛鴦同入夢

寄蘇荆樓

拓戟渾金氣太粗覆瓿會悔賦
三都十年磨劍吾將老四海爲
家道轉孤濯足滄浪愁渙忽側身
天地鼓隲嘲名山亦有藏書

志隱豹忘羊奈異途

種葛篇

種葛南山下葛蔓相因依因依葛蔓長婉孌季女飢女飢食葛
乳織手治葛絲東家蠶作繭西家婦鳴機繭絲一何密葛縷一
何絀未得君體暖當此長夏宜君雖捐篋笥亦待秋風時

英石歌

我在英山產探遍英山奇英山趨庭及十載九華壺貯羅仇池
庭前拜石侍杖屨冷暑無事供娛嬉青天萬里照瀟水秋雲飛
空墜不起山人出山拾得之蒼髓瓊瓏不盈指空青一片石華
脆寒泉百斛銅盤洗山齋往往雨欲來流潤浥浥雲生儿既不
讓八十一穴窮雕鏤又不費六十餘萬青銅錢萬山靈寶一袖
攄鬱林風浪歸南船歸來供置圖史側回眼滄桑悲手澤昔我

先人喜藏書插架琳瑯富丹墨萬卷未遭秦火焚一旦遙同楚
弓擲傷心絕學渺難計案頭小玩何堪惜世間趙璧皆千金觀
鯁未識秦人心青氍故物看肘篋摩挲片石同沾襟

晚飯散步

江流去無聲衆山澹如睡幽行輒有得靜抱隨所寄烟歸竹林
暝露滴草光碎茅簷出疎燈倏與村市會萬籟此沉沉涼風醒
微醉

愛妾換馬

贈君桃葉妹換君桃花馬兒女恩情閨閣中丈夫事業沙場下
相看泣雨更嘶風紛紛遊俠非英雄君不見西楚重瞳子楚歌
泣送虞兮死吾馬吾頭贈知已千秋恨殺烏江水又不見平原
君樓頭一笑斬美人一錐囊底幾沉淪黃金臺下無麒麟

訪客宿龍華寺分賦

舟維怪石亂松邊一笑相看古佛前小刼尙勞塵裏夢

時適以事奔走

未暇長吟又破醉中禪寒濤暗峽驚風雨急雪疎燈感歲年一夕
苔岑話離思此身依舊出山泉

庭梅和何秋客次東坡松風亭梅花原韻

余甫自郡歸

昨日之日歸江村殘臘奔走消羈魂奚囊賸有冰雪句撲面正
苦塵沙昏梅花似與我同病縞袂泣雨愁荒園先生與花似有
約促坐笑語相寒溫濺濺溪流映沙雪杲杲簷日生海嶽先生
作詩爲寫照高吟上叩髯蘇門慎子正容物已悟莊叟得意心
忘言朔風摧花日又薄勸君且倒花前樽

答人饋筍

昨夜驚雷筍破泥野人沉醉不會知江干苦竹瀟瀟雨夢入巴

偷唱竹枝

珠江春

珠江日暮東風起吹落桃花逐江水
照影新波弄泊春飛紅曼
睴脩蛾顰春心飄蕩散幽草嬉春南浦
招春人飄烟抱月夜香
醉窈糾春姿難鬢翠絲絡穿絲綰素馨
中有南劉萬家淚五石
烟螺一日消麝臍龍髓脂河漂紅雲
尙憶昌華宴碧玉於今脂
夜妖江天不動酒光綠亂散春星照
蘭燭粉水多情載夢流仙
湖塵起成平陸花田春翦抽暗芳採
珠歲歲寧明璫書記不聞
街卒報大夫傾盡嶺南裝羅襦舞蝶繞
花家一片靈香斷情種
湓城秋老訴琵琶桐廬人遠悲囉嘖
曳雨牽風楊柳枝我來不
遣青春知文溪祠下海珠石越女凌
波春浣衣

嶺南羣雅

番禺劉彬華藻林輯

李遐齡

字芳健一字菊水香山人諸生著有容安堂詩集

玉壺山房詩話鐵城詩人前有松崖劉室後有菊水及竹
孫香石諸子菊水集余近始見之其詩深於樂府故蒼健
真樸古有天籟清清洽洽樹此幟於
騷壇能使絺章繪句者望而披靡

月夜琴興

月涼萬花醒天宇碧森森此景一在眼無言契予心心知拂苔
石足以張素琴調絲且未弄坐聽松風吟

安南使

安南使來獻俘困獸喙息眠檻車幙頭跣足制府趨稽首再拜
陳王書云是南越之王阮福映奮力誅亂新雄圖故酋光惠昔

作萃淵數結連駟寇招亡逋近時莫觀扶曩者譚悅居東海平
波竊名字潢池盜弄天一隅千艘縱橫出沒巨浪裏脯肝醢肉
剽掠無時無官軍入海搏萑苻巨網實漏吞舟魚映今續服覲
殊錫微勞藉是申區區屬韃擐甲塢其穴執訊獲醜致上都若
曹殺人不知數一死未足償厥辜蠹蟊孤恩既覆國鼠輩幾
載稽天誅此時望闕亟請命驅之入市同羊猪血肉狼藉
肝腦塗賊民于紀有前楨君不見廣州城南寸鬣莫觀扶

鷹爪花

塘邊緣一叢花與葉同色聞香知有花近索乃不得幾時掣韉
去遺此雪泥迹撥葉喜見之擎枝具猛力雀鼠耗太倉孤瓦橫
草澤何當假羽翮平原忒搏擊徒供簪髻鴉女兒帶露摘郢都
時亦無使我重歎息

寄無得上人二首 錄一

慧業文人會成佛血性男子須生天千尋火坑跳身出是關定
力豈偶然緣情生識逐衆妄展轉蠶以絲自纏去來生中孰非
夢懼噩吟嚙紛倒顛師今皈依向初地俗士譏嘲師安眠蓋世
功名等傀儡牽腸骨肉皆孽緣箇中無喪亦無得羈絡意馬降
心猿凌岡片席雲小憩汎舟不繫隨流還味子半生涉世患在
家會學忘家禪忍辱每守居士戒多聞今讓阿難先他日靈山
一笑會駑駘倘後煩師鞭

題張南山詩畫冊

南山作畫師造物破古藩離獨超軼老蓮無人苦瓜沒二百年
來見此筆筆力橫空眼光濶矯矯生氣乃遠出五羊客舍秋九
月竹孫朝起罷盥櫛視予此冊得未曾眉舞色飛破愁絕松擎

短壑生鐵屈舟駕長風峭帆兀者誰飛上萬峯巔俯瞰滄波騰
渴日孤光滉漾忽動壁坐覺濤聲滿虛室題詩意態况欲仙定
是君身有仙骨聞絃賞音墨卿最我知其妙口難說它時莫上
書畫船雷雨蛟龍或來奪

羊城苦雨

春光如夢過花時朝暮沉沉雨脚垂昨得鄉音翔米價早聞田
父誤秧期墨華一現黃綿襖旅髯新添白雪絲何限海氛鯨鼓
浪舞筵深處未曾知

媽祖閣

晚涼動佳興落日澹餘景小步信所如忽到無人境峭壁懸蒼
空芳樹接濃影雲闕臨水開石室傍帟整寂寞兩佛趺明滅一
燈耿小亭壓殿角細路紆延綆登覽頓披豁使我曠懷騁仰翫

摩崖書筆力驚特挺側足憑危闌遠翠出西嶺烟深疎磬遲林
暗獨鶴警玉鈎挂纖痕銀波澄萬頃謾謾松風長脩脩心骨冷
羣象起雙眸衆妙得欣領曲折下禪房室虛几榻靜老僧舍古
姿接待煩儀省悠然生道心默對意彌永浮世苦倥傯細想眞
疣癭何時擺塵韁結託事幽屏

早春東郊口占

山色曉初分草痕寒稍改行人度翠微去鳥破青靄
長松三兩亭倦步時一歇不用問泉甘茶聲已清絕
籃輿兀殘醉拂面風微和只愁斜照短不厭好山多

芳洲

芳洲暮筵散月挂西溪松洗漢露華白漂波山翠重清音間絲
竹香氣逗芙蓉一醉朋簪盍良宵得幾逢

疎雨

孤村岑寂思茫茫夢得新詩醒却忘偶向溪頭閒拾取映空疎
雨斷斜陽

光孝寺三首

錄二

訶子久無林林猶訶子稱可悟世法中萬事浪得名惟有菩提
樹婆娑蔭空庭昨夏鐵廳虐樹倒根株傾古物一遭劫龍象亦
不寧沙門發鴻愿千夫拽長繩起築若神助潛覺元氣生長柯
盡摧拉老幹仍孤撐病葉或垂紗沃沃搖疎櫺滿城善男女悲
涕嗟佛靈果餌塞階砌拜契羅孩嬰一朝盛香火淨土增光明
方知木居士求福信有徵

東有睡佛樓佛睡心不睡幡幡十圍腹滿貯歡喜意佳人求歡
喜爲卿種佛嗣初日照高林寶刹集珠翠丹梯三十級蓮瓣陟

幽閣腰腹幾摩挲。默訴心中事。玉千偶。若歆石麟人。精氣識好。
得白花笑。靨春風醉。却下風幡堂。遊客亦忘避。見慣閨黎閒。歸
興但遙視。衣香上界停。金釧法門施。借問達摩泉。還帶曹溪味。

對月

天清霜白。夜烏啼。山月依人。故故低。我有愁心。憑仗汝。可能寄
向石城西。

曉出松堤口占一首

不見烟中人。但聞語烟畔。流泉響不絕。輕靄淡初散。啁啾曙禽
呼。撼撼風荷亂。松梢滴殘露。星芒耿餘漢。奇峯孤雲生。遙浦疎
虹斷。夕月未西匿。朝暉已東燦。愛茲經稻香。裴徊倚溪岸。

白雲山頂放歌

步出城東門。一路走平曠。逶迤入深山。不覺在雲上。初經滴水

岩夾壁屹相向明鏡飛流懸灑然滌塵障魚貫登丹梯微逕絕
依傍足外垂二分失勢落千丈踵接後人頂石壓前人項所賴
首猶昂顙令膽增壯力欲追勝遊歷險神彌王良久達其椒眼
界茲頓放三十有六峯峯峯各殊狀林巒相綿亘左右通揖讓
諸山兒輩耳膝下敢行抗俯瞰珠海中依稀覩盆盎白雲何瀾
漫浩若秋水漲恍駕半葉舟乘風破寒浪崇岡跨聚龍動石叱
寶象絲絲鬚邊風殘梅半空颺恰愛夕陽時好景供晚望大笑
喚山靈高揖問無恙勝趣惠吾人曷以答家貺我聞秋濤翁別
業夙構勑雲淙今則無哲人將安仰當其振義旅談兵坐虎帳
利鈍不復知意氣何激宕轉瞬百餘年樓館並漸蕩矧屬李與
孫遺址更焉訪李忠簡有小隱軒玉虹飲秦帝求神仙枉爲安
期詎人生貴適意毋使山靈謗把酒楓林間豪吟洗惆悵疎鐘

拂樹來隱隱聞梵唱高卧鶴舒臺直待山月亮回頭盼層城惟
見烟雲盪

題黎二樵懷人圖二首

頰首抱素琴徘徊綠楊處秋楓江上雲將此寸心去
觸物俱堪思何分柳與琴眼前惟雨態空外有絃音

海幢寺三十二韻

龍起三韓境兵臨百粵時樓船下龍水日月指靈旗攻拔將軍
力安全聖主慈慶雲消瘴癘滄海伏蛟螭開府分雄鎮封王
總庶司威行民震懾賊斫佛扶持香國經營始禪關締構奇訶
林殊壯觀楊宅拓遺基十郡勞鳩庀羣僚廣布施重門趨陛迴
傑閣轟霄危供養虔無懈工程浩不貲梵宮生氣色閭巷竭膏
脂侈念希冥福何心及世嗤鯢軀旋就僂象教木難衰晚俗爭

隨喜輕舟亦遨嬉
踐幽懷頓豁涉勝足
忘疲潮勢珠江抱嵐光
玉岫披語繁鈴僕曲碧
皺瓦參差法體金齊棟
多羅綠翳堦小
亭荷作屋遠岸樹浮薺
地鏡埃那著廊陰午未
知釜寬容百斛
鐘動飯千緇共讀漁洋
句還尋雨叔碑
笑流都已邈華
蓁尙如
斯賤子長遭慢名場
簡受鷗撫今徒惆悵
弔古但吁噉南武逆
謀左逢陽歸隱遲
前纓憐繫頸懸
憂悔然眉荷荷呼
奚及空空
佞果裨富樞當
檣列啼鳥出林窺
返照明雙眼
遠風飽獨桅登
臨須盡興猶有後人悲

送別子谷返香山

秋霜蕭瑟秋葉殷
籐笈松舟歸故山
亦木爲佳吾且住
不能相
強汝先還拾才白
日黃金擲裁曲
春風綠綺閒
一解勞行抵錢
酒離思汰夢眼
鰥鰥

步月同澈溪一首

風枝不定鶴吟巢
鼓統統隔樹敲
明月白雲天似水
寒光吹上小梅梢

長畧水隱居

亂峯環繞處
隱隱兩三家
細路沿雲入
閒門映竹斜
兒童識晴雨
風俗習桑麻
相問忘年歲
溪桃第幾花

方竹孫夜訪余於圓山分韻得康字

清秋露白吹蒼葭
終日懷人思未休
眼前溪山浩不管
造物似笑鰕生廉
貧士得館如拜職
齋頭坐披衣
伏案何人問訊
圓峯竹侵星不畏金
吾嚴人門拂拭衣
上月挂我藤梢之
古檐左右涼風展
長席披襟快語時
掀髯平生做儒道
氣寡薄躬流輩得
免嫌竭來浪迹墮
泉壑蝸牛蘚壁枯
涎粘幾日長鑄早
禾熟江

村陸續鳴霜鏤處處耬聲通耳聒歲豐那情清夢恬田園我儕
果何有水旱每爲農家占論說桑麻亦差樂招邀雞黍聊相淹
夜闌歡對啜茗粥紛紛殘月篩蝦簾

夜半放艇岐江作

月白霜寒野水平小航隨意泝空明數峯曲岸逶迤轉一葉中
流自在行忽憶仙宮棲道侶何空磯鍊師時寓龍王宮之雨仙樓擬來虛閣聽琴
聲不關興盡忙迴棹鶴夢方長未敢驚

方子谷暮訪山齋

春夕含微清爭樹歸禽語畊夫各還家篝燈弄兒女華月匿高
雲空齋寂無緒剝啄出非望却晤烟霞侶論心逾歲年忘形到
爾汝道義殊今尙相期厲古處貧交聚不常茲來自何許隙火
動風泉遙帆隔平楚幽偏足娛人能爲一延佇我有山中石案

粲白可煮烟村重見尋持此贈君茹

仙湖有竹齋留別方子谷鄭遙川

行者不忘歸如足不忘屢兒病況歲饑時復煎百慮勞君拂虛
榻苦欲留人住匪論事得失自異情鬱豫薄言旋故廬慙莫謝
深憐天際孤舟發蕭蕭江雨暮暫離形迹親神魂未同去相望
三百里有夢不難度夜夜託明月照君城邊樹

高岡劉丈招遊銀坑

在廣州城東北二十餘里

丈人清秋叩禪關

時寓定海門外慈度寺

邀我往看銀坑山軟輿侵曉出

東郭雲日鮮霽空宇閒黃縹塘邊棗纂纂繡狗嶺下溪潺潺翻

藁田家望晚造經月不雨禾葉斑水車聲確響林際偷淋似怨

天公慳寶象摩星人遙顧撲面生翠飛烟鬟鄭仙巖上人似豆

危磴一綫愁躋攀

七月廿四安期上昇是日遊人甚衆

何年誤室滴水眼珠簾不

見懸雲間路轉林迴開異境四山合抱如玳瑁松風謾謾鳥磔磔舍輿緩步登孱顏羈客無悰日懶出茲晨喜散腰脚頑飛凌絕頂一長嘯瓊子骨節鳴珊珊

夜歸

香蔓藤花露氣勻夜歸涼踞悄無人竹間堊月壁搖粉池面批風雲感鱗泉客五秋方宿草

方子谷卒於乙卯之九月

石城千里濶音塵

去年

九月得澈溪石城書至今傷離嘆舊并今夕夢境中年哀樂真

黃香石梓詩話成却寄

輓近風騷得別裁中流欲障紫瀾迴遍拈鴛譜教人看也采牛溲到我來詞賦何心驚四海陽秋有筆嗣雙槐故應破却魚龍

睡昨夜高吟得月臺

在海珠寺

嶺南羣雅

番禺劉彬華藻林輯

顏崇衡

字湘帆嘉應人諸生著有虹橋草廬詩鈔

玉壺山房詩話余向見湘帆春海一航集極賞其寒燈雨人讀破窻一僧煇沙色聚涼月風聲爭亂流石稜穿浪笑篙力壓波橫人行於鳥上泉落亂雲堆等句以爲得未曾有今復觀其全稿古艷幽情別成風調其人謙雅與秋田相似以李頎並稱宜矣

烏夜啼

琉璃燈紅光照地錦幙高張殿深邃
翩何姍姍環珮來翠袖雲裳紫霞帔
歌停起作鸞鳳翔衣聲絳繚衣香膩
寶髻鬆玉釵墜一雙金蓮不到地
秋波乍轉君王醉肉作圍屏擁珠翠
烏夜啼啼爲誰啼向吳王懽樂時

斜月朦朧河漢秋雕檻碧瓦梧葉稠金井涼涼玉階靜霜氣露
華生暮愁美人獨立欄干頭袈帶飄飄看女牛此時珠簾盡上
鈎漫絲急竹嬌歌喉餘聲風送深宮幽眼波化作鉛水流烏夜
啼啼爲誰後庭零落君不知

闔閭城頭擂大鼓月榭風臺倏無主零香碎粉隨灰飛殿脚三
千散如雨陰房燐影美人魂暗泣生前此歌舞邱隴千年無虎
柱白楊蕭蕭被樵斧石局埋恨懣懣苦化爲妖狐作人語烏夜
啼啼爲誰昔人懽樂今人悲

贈朱玉亭

玉川之貧數問屋僕則長鬚婢赤足玉亭之貧過玉川破屋無
婢亦無僕痴兒藍縷妻蓬頭往往盜瓶無斗粟否塞屯蹶五十
餘衣不掩脛食不肉近年藥石爲候糧饑時藥鑪煮糜粥得錢

沽酒卽盡醉醉飲惟把南華讀興來吹火短燈檠擁鼻鳴歌
且哭蘸筆淋漓千百言墨瀋燭光交熠燿擲紙氣欲凌滄洲焉
知此身仙與俗先生負才甘知希自是貧中有清福安能折腰
事當權覲然妄竊升斗祿入世古拙如痴聾若對吾曹每忠告
我時過訪先生家入門三逕唯松菊蠅蝓織網風吹瓢蜚籍畫
圖三五幅蒼鼠走地雀噪檐日曬牛衣無襖襦天寒留客讀新
詩白開小圃摘蔬菹當筵雄談出戶外村兒驚怪此老禿詢之
東鄰西舍翁生來不識君面目卽識面目不識心我識君心如
璞玉我識君心君識我請君作歌爲予勸

送楊秋衡張思泉讀書西山寺

遠俗尋幽境空山闢古藤靜隣金粟佛寒對白頭僧徑僻人稀
到崑深暑不蒸禪窗學吟咏思定冷如冰

憶陰那

樵徑緣雲上，芒鞋踏葉行。
藤蘿一庵古，瀑布四山聲。
野鳥巢簷穩，寒泉入竈清。
客中迴首憶，舊事記分明。

寒夜見月

古牖燈初滅，荒村漏欲闌。
愁人與孤月，不辨孰高寒。

旅夜對月有懷

海上金風起，城頭玉漏殘。
流黃機畔月，今夜幾分寒。

雲巖

行窮梯百級，天半落潮聲。
一幅水簾瀉，空菴雲氣生。
客從羅逕入，僧出石橋迎。
日午投筇坐，衣襟濕翠橫。

仙城寒食歌四章 錄三

五仙城頭飛木棉，五仙城外啼杜鵑。
青鞋破帽一羈客，獨上仙

城神黯然仙城本是陀王闢陀墓千年人不識生時枉竊帝號
娛死後無人作寒食豈徒陀墓無人作寒食漢家陵寢俱荆棘
爲帝爲王等逝波持樽酌爾老夫陀

闢陀墓

金蠶珠貝爲梓宮晶簾接地穿玲瓏中間黃金鑄王后旁學士
亦銀所鎔其餘璽印兼襦匣光動幽房魑魍攝天公厭爾白龍
奢故遣雷鞭摧馬鬣雄雞一聲農父來霸王朽骨成寒灰嶺南
四十七州死無抔土藏遺骸魂兮歸來何有哉年年寒食梨
花開

劉主家

塵寰萬事東流水石爛海枯情不死梅均遙對素馨斜兩處玉
人呼不起人呼不起泉扉局一片春魂渡江沚雲埋艷骨土亦
香人種情根花似海二月三月東風吹四圍開遍花參差好鳥
和歌峽蝶舞遊蜂作陣鴛鴦嬉萬紫千紅遮薛碣想見騷流捧

土時捧土人今亦黃土碧草煙縈綠楊雨且對仙城盡一杯
爾美人兼霸主 百花墳

雨夜不寐作寄家旭亭碧巖

一別已寥寂况兼寒雨聲芭蕉三五葉滴滴到天明人隔暮潮
潤愁隨春水生今宵眠不得無夢度江城

夜坐蓮溪書屋感懷謙山舍人

春來花亦失芳菲幾樹殘紅歷亂飛從古騷人慣岑寂吟魂應
向月中歸

百盞華燈映玉卮四年前事尙全知今留幾隻虫吟徑略似更
深酒罷時

雨夜

花香濕不飛燈影寒逾碧野風故侵人入我蝸廬窄房空靜如

僧衾薄冷到膝飢鼠走破厨幽蛩語虛壁夜久寐不成稍嫌檐
溜滴

憶環青齋作寄吳生蘆村兄弟

諸澗水聲繞四山嵐氣攢門開羅逕僻床對鶴巢寒泉石三年
別風波一路難長松須愛惜歸與再盤桓

蓮溪秋夜作寄吳生竹君

滄江如此濶夢不識松鄉落日秋風動孤檠四壁涼骨因多病
瘦心爲著書忙白也同樽酒指秋田歌聲尙慨慷

題吳荔村大同草

誰帶邊聲入草堂鴈門闕鴈到南方風流節屐眞名士嘯傲塵
沙古戰場萬里烽烟開壁壘六朝金粉挾冰霜挑燈讀罷心逾
壯夢逐黃雲出塞長

嶺南羣雅

番禺劉彬華藻林輯

陳曇

字仲卿番禺人諸生著有海騷

玉壺山房詩話仲卿天質秀穎十齡即工吟咏稍長伊墨卿太守見其詩奇之山是知名近又爲曾賓谷先生所器重贈詩以小鳳凰爲喻其辭有云文章誠藻耀音聲如玉瑯易不覽九州去作千仞翔

古意次墨卿夫子見懷元韻

巧笑慙羣女情人眇古歡誰收和氏玉自采越江蘭雲起千山
暗秋高百草寒蕭然攜綠綺中夜望空彈

寄伯兄

時久不接書

無端又度九秋天書與飛鴻竟眇然亦有傳聞來嶺嶠祇言搖
落滯幽燕五年夢隔關山遠萬里心同日月懸堂上老人思汝

甚黑頭今已變華顛

夜合花

晶珠簾外月明時見汝含情不自持多少青春人誤了白寒清
曉最相思

獨坐篇

獨坐兮生愁懷美人兮路阻修翡翠屏兮毒瑁牀珍珠簾兮珊
瑚鈎抱貞素兮無匹儔出戶兮躑躅舒青睛兮遙矚好花兮落
紅細草兮抽綠池水流兮不涸鳥聲斷兮還續遲美人兮不來
我思君兮亂心曲時倏忽兮春已深登高樓兮發長吟長吟兮
奈何憂不絕兮涕滂沱乘文豹兮驟青鸞上九天兮路漫漫犬
聲吠兮雲間抗手迎兮列僊訪飛瓊兮游蓬萊見嫦娥兮棲廣
寒嗟下土之難與處兮吾終於此焉盤桓

陳嶠生旣死家貧弗能葬其友欲醵金爲之卜窆窆焉

又弗從也感賦

可憐旣死日留滯尙如斯數尺桐棺在高堂鶴髮悲素車虛范
式黃土遠要離何日歌虞殯平生劒把誰

詠懷

平生高自許志願幾時酬學術眞芻狗文章類棘猴承親惟色
笑思友愴離憂亦學君平易簾垂不上鉤

從來天下士爲己不求知致力三餘足潛修千古期如何生晚
近所競在新奇曲學空阿世無人爲轉移

著書見後世天特與虞卿有我春秋筆隨人月旦評交游眞性
少塵世古情輕欲作中流柱修身且力行

曾參能養志有若教爲仁文學師游夏支流取管荀行眞愛徐

穉說最關蘇秦死友惟張范長嗟望古人

青春既已去朱夏漸全非每自來花徑悠然開竹扉白鵬鳴在樹獨鹿走衡衣此意何人會吾寧杜惠機

送從弟標歸里既登舟以舟人明日啟行乃復歸宿喜

賦

清風動簾櫳征夫忽復至玉貌瘦骨出猶有早時淚白日非夢中相見果何意區區去更來母乃出天賜情知無幾時取足今夜醉鬪鼠飢上堂蝙蝠展其翅案上短書檠燈花開又墜淒慘雨離人此景君須記深談雞幾鳴莫問明朝事

夫君

悠悠江上水似我念夫君月照鴛鴦帶風吹翡翠裙無繇抗瓊瑋只欲化香雲今夜相思夢金鑪取次熏

殘月

沈沈海氣隱秋河殘月初升發浩歌青桂嫦娥兩岑寂人生不滿意時多

路字韻一首

并序

西園之會以湛若先生人日登越王臺詩青山白楊道綠水流花津十字分韻賦詩梁梅云是青山白雲路非白楊道時諸君子皆以曇言爲然是會張存禮得楊字張其統得道字其統詩先成越三日攷嶠雅乃知曩者之誤而梁梅之強記爲不可及也於是使存禮改用雲字而曇賦此以謝焉

平生飽讀畸人句錯記青山白雲路梁生背誦我搖首老子於茲豈有誤那知今日越王臺不見蕭蕭白楊墓雌霓連蜺欲好

音枕流漱石成殊趣。改之未抵一枝閒。證來可是春愁起。但恐將來考據者。兩處闕疑昧其故。熟極生譌。理或然見善而遷情。可恕作詩一笑。且焚之。點竄澄江公莫怒。

感春詞

昨宵春夢太零星。曉覓園花插膽瓶。總是天桃與穠李。教儂雙眼向誰青。

由華首臺入沖虛觀遇雨

不知我何人。疑是雲中君。雲行不礙我。我出始覺雲。濃煙起足底。送入雙石門。僕夫在前途。尋丈呼不聞。覆立受雨點。衣袴皆難分。林濕一身小。瀑怒萬馬奔。掠地白杲杲。插天碧泆泆。雖然飽我眼。未免勞我筋。景佳興不愜。趣惡情獨欣。且洗心中熱。餘事何足云。

夜臥禪榻墜地而醒

一日山中行兢兢無蹶步如何安衽席墜榻忽驚寤至人戒持
後始克免憂懼放心自娛樂處處得謬誤初疑落深潭旋似入
古墓神寧獨肅然於此發妙悟請看古來者失足在遲莫

合掌巖

石態千青冥水勢鬱滯沆陰氣太逼人獨立倚藤杖欲留足先
行將俯首仍仰凡心洗飛流淵靜寄深想精衛銜不能愚公移
豈尙東坡神已怡南宮心定賞千尋雲霧生萬古風雨長人生
百憂患快意只三兩非爾賦性頑誰能長合掌

黃龍洞

朝行見黃龍暮行見黃龍黃龍不可見雙瀑如白虹今晨始發
奮直上黃龍宮洞口羅怪石山腰拱羣峯游宮失維霸賢祠毀

兵戎躊躇三歎息天半吹松風

寶積寺汲卓錫泉

名山可著書我來覓栖宿行行至茲地始得暢所欲門空極干里僧貧住一屋蕭疏旣悅心空濶况娛目吾暫賦歸與逝將居此卜且尋卓錫泉清絕手可掬吾間領南水甘冽唯茲獨身如鼯鼠飲不覺已果腹提餅汲盈甕取之亦至足攜爾到人間未必出山濁

寄林上舍龍

春草碧如此故人殊未來關山人一處風雨洒千杯半落高張誼飄零管樂才何當舒望眼試上越王臺

牀頭金盡將典春衣侍姬潛易以釵鐲覺而問之則曰裘服止餘一雙耳去之恐輕寒中郎體也余感其意

爲賦此詩

東風作意掠幽窗獨臥牛衣尚慨慷半臂有人憐小宋貂蟬終
自誤江郎禦寒自分無狐白貰酒何當典驢驢記取他時同一
笑餉釵阿杜不相忘

謝孝廉光輔過訪

自笑此身長役役要與古人爭一席名花幾樹只獨看春光七

朝復誰惜

二十九日立夏
時廿二故云

十年墜事人脫略五畝家園地幽僻

偶然執卷立庭除柴門忽啟來謝客經時把臂情已欣片紙論

文談更劇青春歎我作書淫綺歲同君有詩癖敢誇陶謝不枝

梧浪許杜韓有來歷

君謂予詩始無
一字無來歷

丹心一寸久憐子素業千

秋少將伯頗存直道山膏罵詎慕浮名腐鼠嚇知道從來棄馬

肝嗜學真如取雞蹠自然驅使到草木未免膏盲入泉石今秋

重約訪東樵君家儻辦游山屐

七月十一日夜雨童子告予曰此雨聲髣髴羅浮華首

臺時也棖觸舊游遂成四韻

冉冉江湖秋思興登山臨水倍關情如何獨對青燈夜偏憶同
聽疏雨聲此日我非垂翅客他時槐亦不平生寂寥况味須牢
記又是鄰雞喔喔鳴

感事

報國心徒切居家感易生眼逢金虎發身作鐵龍鳴王猛空捫
蝨終童不請纓滔滔歸海水何日戮長鯨

海上今充斥澄清可待人父兄如僕射盜賊本王臣處處烽煙
數家家涕淚新建牙吹角地告急一何頻

臨海樓船壯登壇節鉞雄出師原有律議撫久無功不解甘寧

纜空遺卻至弓將軍最儒雅相見肯兵戎

充國屯田戍邊關有事時要煩回紇力可使吐蕃知偏伍多驕
卒家兵集健兒由來多壘辱將汝復何辭

張角雖名賊孫恩獨號仙鳳凰公已變鷹隼爾猶鸞錦纜千艘
泊黃標萬庫懸莊生誇有道富貴兩能全

日日空聞警朝朝待捷音弓刀春月迴砧杵暮雲沈寂寞匡時
略蕭條濟物心饒歌誰屬草倚劍發長吟

春日遣懷東里中諸子

日日空癡坐年年欲遠游騏驎消壯志鶯燕抱春愁齊瑟工誰
好隋珠暗莫投男兒好身手夜看吳鉤

客夢隨春草詩心戀夕暉圖書原寂寂花柳自依依世事方金
甲吾儕尙褐衣高歌臥滄海十載素心違

憶昔盟車笠陳遵結古歡

陳孝廉

誰分運期熱

梁

自念邵公寒

袁

沈炯通天表

時休二久客廣州

鮑昭行路難

顏四在都

乾坤此朋舊爲汝涕

沈瀾

華年近三十貧賤况無戚友壻輕嚴助閨人誚仲卿彈琴頻對月把酒欲聽鶯決意嬉春去先妨鵲鳩鳴

六如亭

子霞埋玉後亭尚六如仍君肯時宜合兒應法喜稱湖山誰獨往煙月漫相矜莫擬清娛墓荒唐失所憑

千古桃花廟三生燕子樓綺羅多所豔粉黛未宜收不朽隨郎

主重修賴郡侯

伊墨卿師前守惠州修六如亭重立朝雲墓碑

古今一相接湖水蕩人

愁

墨卿夫子示所藏周號叔大林鐘拓本命賦

三代法物稱喬皇無射鐘始周景王何時號叔效此作秦中出土來維揚當今海內癖金石芸臺中丞誇擅場得鐘試拓款識見逐字細釋矜最詳吾師清俸獲鉅寶好古信可歐趙方厥初造器有窕佩數語勒銘仍吉祥上嚴下翼降多福萬年子孫寶用享潛幽閱世三千載地底幾度滄爲桑永嘉輒出番陽縣龍山又甘泉石甘泉山西漢石甌中人間搜剔遙相望尊彝蠹洗盡揮斥斑駁獨留清閤藏維鐘寶紹大錢鑄未免民怨還財傷誰言曹惡鮮不廢物以積久興方昌夏鼎始皇失泗水周鼓昭代排膠庠銅仙旣拆魏青龍瓦當尙拾漢未央邠人三鐘本楚賜考據疇足稽存亡大林義具內外傳茲鐘得主增輝光莫從剽棧辨中小庶審石播聞短長右銑形刻飛鳧竦墨卿師所寶鐘結右銑有鳧形云結體勢睹文鸞翔斯牽黃狗合弟音繡變蚪蚪同輩行蒲牢扣響

應清濁葭琯順節和陰陽寒玉齋墨卿師齋名頭警清夜間以擊磬聲鏗鏘金鐘大鏞在東序拂拭異日登明堂

賓谷夫子見示光孝寺七古次韻奉答

江西派衍傳詩法山谷會修浣花業五百年一南城公應運文章富枝葉和聲鳴盛更誰能不數庾信同徐陵南豐吾欲辦香事學佛要傳無盡燈梅花國有賤男子青眼高歌寄愁此寓公卜宅考分治訶子成林記留軌南園夙結談詩社海雪尙傳洗硯水竹垞不返漁洋亡一代風流在公矣嘻噫古人不見誰後來俯仰人間空可哀悵望千秋亦徒爾舉目但見梵宮葉落供僧柴公能拔我爨下焦桐材自此拂拭離氛埃比似菩提新植樹陽春煦澤滋株蓂

墨卿師命題戊己四游圖

藥陽扈蹕
泰常觀雲

湘浦橫槎
羅浮坐月

長城騎馬秦時天瀟湘萬里空洄沿望雲泰岱躋其巔海天月
向羅浮圓驅山倒海非偶然人生此境仙乎仙靈之來今紛紛
翻然獨跨黃麒麟前年曾遇碧霞君歲晏又慕湘夫人相逢月
下梅花邨脫贈一襲麻姑裙灤河之陽賦行役耶官自執東華
戟紫霄拜命持玉尺湘江采秀乘槎客東嶽巖巖暮雲白東樵
娟娟秋月碧十載清游轉陳迹令我掩卷三嘆息

合江樓讀黃仲則洪稚存詩集因憶去歲梁明經貝都
門未經謀面枉贈詩篇有君詩自近洪與黃君才更
欽華與實之句作此奉荅

合江樓下雙江水水自東西合一源此作百年思謝眺當今無
輩惜張溫憐君萬里先投句媿我經時久閉門少日噉名勞刻
畫家丞秋實向誰論

光孝寺新建虞仲翔先生祠爲賓谷夫子作

昔賢直諫遭遷謫指點江山有遺跡種樹會居建德園立祠今
就功曹宅自貶交州作寓公遂使青蠅爲弔客曲鉞腐芥語空
奇石暈蘭芬才可惜注易功深折孔融談兵識絕驚孫策一人
知己意堪傷千秋論定曾方伯舊苑離離事久湮梵宮凝睇感
前塵塞北共垂蘇武淚仲翔徙交州十九年江南誰省仲翔徙于爾衡墳交州其喪
吳紅雲一片賓筵做訶子成林廟貌新賈誼屈原真伯仲高文
典冊燭星辰師自製文立碑如何地老天荒後始識鸞鳳泊人敢將
懷古蒼涼意寫入迎神復送神

荅劉孝廉華東

藝也東閩賤男子十載狂名滿人耳文章一任謗羣兒意氣終
然感知已憶我垂髫便識君愛君能飲復能文不妨白眼看時

輩特起蒼頭張異軍名士紛紛喜徵逐此中有物能離俗
人惟李藥師郡才我數邱靈鞠年來寂寞賦閒居猶有桃根伴
察書

君精書

學佛學仙存故態亦夷亦忠認今吾

敬酬賓谷夫子寵贈之作

賁隅八桂林俯瞰大海水其上迴日月其下蔭蘭芷奈何溷凡
材棄置蠻煙裏一朝匠石來環顧爲之喜小材棄枿備大材楹
桷時雖免拳曲譏尙待繩墨使況當發柯條雨露滋旣始養到
凌雲時高高去天咫感茲樹木心歲寒真有恃

嶺南羣雅

番禺劉彬華藻林輯

姚廷掄

字匠門番禺人諸生著有竹嘯山房詩稿

除夜

往歲逢除夕庭前慶玉樽今宵重守歲堂上憶金萱
雨急聲偏苦鐙寒焰不溫恐牽嚴父恨背面拭啼痕

歸善道中

鎮日推篷坐風濤次第經波光侵岸白山勢入雲青
土語初難辨禽音漸可聽茫茫對江水身世歎浮萍

紀別三首

凜凜歲云暮晨起理書劍驅歌催就道欲行尙顧戀
阿兄前致

詞予弟將行遠爾性疎而狂世情少諳練幽蘭雖自芳美玉莫
自衒事勿謂已長行勿居人先自量寒與暄餘力事筆硯長揖
謝兄言不覺淚如線弟亦勉阿兄努力加餐飯

回頭顧內子內子首蓬飛爾父官離江不慕甘與肥于歸已八
載辛勤事重閭椿萱苦見背長年臥牛衣我今遠行邁弦望各
有時點首似欲言未言先歔歔我亦會卿意中心捨以摧飢寒
我自理井臼卿自持

有女方四齡未知離別苦聞爺將遠征強欲同舟去團團在須
臾奚忍推之遽暫且與溫存暫且與煦嫗僕夫再催促冉冉日
將暮忍涕揮衣行出門隕如注

流鶯詞

流鶯日日畫樓西啼得殘紅作隊飛應爲深閨春恨苦故將嬌

語勸春歸

寄內

庭竹兩三竿蕭蕭作晚寒遙憐深閣內轉憶客衣單微雨燈無
焰孤吟夢未安揅揅端賴汝并白不辭難

歲暮

凜凜霜風逼歲除浮生難得是閒居邯鄲久淡遊仙夢光範羞
陳宰相書遙憶西陵羈五馬外舅朱春岑太守時客杭州劇憐北直滯雙魚
久未得家兄書懷人感舊真無賴况復羊求跡久疎

夜泊

野渡停孤櫂披衣坐夜闌山風銷酒力江水浸春寒隔岸漁燈
暗中流露氣團荒雞聲隔膊歸夢未曾安

寄兄

秋風又見雁南征無限離懷觸處生落葉漸成催老物吟蛩半
是可憐聲全輸尙戀閒中局小隱猶談紙上兵何日輪蹄歸計
穩一塍相與課躬耕

嶺南羣雅

番禺劉彬華藻林輯

殷師尹

字耕野博羅人諸生

準提閣卽事

半龕佛閣三株樹四面雲山兩個僧乞與趙昌添畫本亂山紅
葉一層層

墨卿先生書至許撰先考墓誌喜賦

竟答深源請音書下海鄉九原銘郭泰五事賞中郎輿論徵黃
髮新題愴白楊崢嶸荷史筆慚愧比龍岡

寧武哀

弔周將軍遇吉

礮車衝山山爲開千騎萬騎如奔雷斷頭將軍裊血出十八孩

兒鋒倒摧孤城一破將軍死流賊聞之淚流眦櫻城盡似周將
軍我輩焉能飛至此

阜城門

吊明御史王公名章

阜城門門下蟻賊如雲屯緣堞而上矯若猘從騎駭走何紛紛
鐵面御史起叱賊身寧負賊肯負國以刀斫膝膝仆地頭顱一
碎血花墜後來又有抗節人八閩風雨還酸辛

公子之拭死節
于閩甚烈

嶺南羣雅

番禺劉彬華藻林輯

蔡廷榕

字秀宇一字季材南海人諸生著有古琴室詩鈔

玉壺山房詩話季材妙齡從張墨池顏穀田讀書棉園余
嘗見之對客揮毫翩翩自喜追金谷詞客遂彈馮篋與余
契濶十餘年矣天分過人詩才清麗五言如孤花偏耐雨
遠夢不離春食貧惟有儉在野不言才斷雲秋岸淺涼月
暮江空江長流夢短愁重壓舟輕七言如風雨一天欺破
屋鶯花三月關比鄰白晝簾櫳雙燕睡綠陰門巷一鴉飛
隔巷犬聲喧到屋對牀燈影澹於烟林棲身似新充隱吟
癖人傳久嗽名三年小劫殘灰在一土虛名畫餅看皆集
中警句

西山樹菴張約齋故園也顏君猷讀書其處偶過感賦

久雨得晴乍草木態一變叢綠欣夏迎稀紅眷春餞西山風日
淺林壑掩葱蒨尋異撥蘿逕叩寂歛僧院山禽知客來坐樹聲

緩囀空階散流塵入眼了不眩東廂特排闥橫架見萬卷籀書
一斗室凡百俗緣遣名場競奔逐知子薄時彥自顧非夙慧頗
喜事筆硯寸鉄不在握努力能白戰幾爲識者笑仍荷故人眷
交通才未盡司馬遊亦倦事往獨回首樹老曾識面十年此輒
醉如夢記游讌今看禪榻烟昔艷舞衫茜變遷倏陵谷消滅終
露電喃喃話舊愁但有空梁燕薄暄坐忘歸感逝意留戀捲簾
悵無語飛花墮如霰

秋懷四首

良夜境幽絕四壁聞蟲吟嗟爾細微物亦自悲秋深月黑樹無
影庭空烟易沉百感入孤坐新愁萌夙心悵然撫塵匣太息幾
中琴

大羅天路遙霓裳不容聽自無神仙骨銖衣愧難稱漠漠零珠

塵聲價等照乘喧喧笳吹音秋來奪清磬聰明偶然錮欣厭詎
先定牢抱質地堅同心異時贈

墻角芙蓉枝艷艷紛晴葩凌晨皎如玉晚醉成丹霞顏色變朝
莫物態堪嗟呀匡廬有真面夢想窮幽遐

百里珠江流一去情脈脈故山此時月秋色滿泉石豈無寸心
在短燭難永夕孤花飛遠風墮溷果誰惜塵勞判醉夢不那酒
腸窄

盆蘭

崇蘭自孤標生合戀空谷一朝悔移根含淒別松竹魂愁飛舊
山影淡落華屋綺石月低蔭瑤堦露新沐慚愧抱素心把玩供
醉目入室誰聞香因風自流馥秋深衆芳歇藤蔓被林麓西園
蝴蝶黃斜光懶相逐孤情何不言湘簾伴幽獨

鶴山易氏子士人也病爲庸醫所殺其妻殉焉余聞而悲之作詩紀其事

雨窓蕭條觀古書列女傳好雙眼舒才藝雖多等沙礫節孝之寶同璠璣有客過門撫我卷口欲有述先囁嚅鶴山易子賦性愚壯歲攻苦不顧軀燈前讀書妻辟纊一朝二豎橫作祟心血枯竭身羸瘡庸醫一藥致之死鬼門去路真斯須父母痛子聲慘呼有淚直欲傾江湖鄰人聞之皆嘆吁妻獨不哭面向隅遂巡却入空房去空房寂歷聞啼鳥低呼夫壻少相待笑看白練歎有餘陰蟲唧唧燈模糊愁雲如山壓其廬魂飛步健不用扶急覓夫壻奔前途翁姑走救魂已徂淚珠剛爲子拋盡欲更哭之無點珠我聞客言掩卷立驚嘆不覺衣汗濡夫死殉身古則有如此澹定其誰乎旣而思之爲踟躕汝從地下尋汝夫堂上

何人事翁姑嗚呼堂上何人事翁姑

寒夜懷舍弟楠

江天欲雨雲無光北風似剪吹爲霜凍合前山斷來雁車輪百
轉離居腸前塵蹭蹬休重說身迫饑驅還悵別誰憐王粲尙登
樓自笑張儀但存舌燈花客館夜流輝却訝鄉園信息稀寒生
弱弟同眠被暖入慈親舊製衣北堂明鏡多華髮百里關山夢
難越萱花無恙尙忘憂莫惜殷勤寄郵札

答鳳石病起見示

經旬不見病維摩傷別傷春奈爾何九十春光半狼籍尋常酒
債又蹉跎名駒健骨成癯鶴黃絹新辭託綠波知否江天好明
月水嬉連夜沸笙歌

立秋前一日集阮室同陳子常仲卿

輕陰竟日護重門涼入幽人半畝園風雨欲來頻看劍詩書無
恙合開尊清秋似客歸何緩殘暑如雲去不言共惜流光念知
已隔宵閑夢剪燈論

仲卿言昨
夢永伯

南浦

南浦魂銷又別離一場春夢幾然疑江波無盡愁如此山木能
吟恐未知清鏡自憐消瘦影紅蠶空剩短長絲尊前便是迴腸
地不到回頭不淚垂

秋夜懷梁則甫

西風吹白雲孤鶴一聲聞故里此時月清光應照君庭虛秋漠
漠夜寂露紛紛迢遞家山道空思麋鹿羣

落葉

雲散荒山莫淮南秋氣深橋危寒水咽樹老病蟬吟野店不成

夢朱門無此心何人殘照裡駐馬倚空林

盆松

蟠根無尺土結束自成陰縱少雲霞契仍堅霜雪心長材短不
護晚節早能任試倚風檐聽小龍應獨吟

古琴

有客鬢皤然橫琴撫七絃絃中多古意此意詎能宣落日蒼梧
道東風啼杜鵑離憂渺何許瑤瑟隔湘川

得劉羽樵書

西望故園杳曉風吹夢歸飢思良友粟寒念老親衣惡耗傳來
急時有盜警鄉書盼到稀開緘墮清淚真悔客游非

十二月朔馮孟招同人泛舟珠江臨鄺湛若先生忌日
生阨才兼遇死留琴與書歸魂珠海濶流恨楚天虛白日蹉跎

過青山涕淚餘遙遙百年事憑弔一踟躕

寄顏素亭鎮安

故人客西粵歸計尙蹉跎夜夢灘江雨春愁珠海波孤鴻不可託相望竟如何自別知音者素琴塵凝多

舟次石壁夢從子兆圖

不寐愁如水孤篷燭自明十年傷逝淚一枕急流聲顧我勞行役因君悟死生披衣坐長歎侵曉又遐征

夢伯兄榮宇

形容看慘澹執手却疑生家剩妻孥累魂知憂患情身猶餘病態語不離歡聲起坐驚寒柝夜烏啼到明

題趙松雪畫竹

當年健筆最縱橫兩美爭傳趙管名誰與王孫留勁節墨烟零

落汴梁城

嶺南羣雅

番禺劉彬華藻林輯

潘正亨

字伯臨一字河渠番禺人候補刑部員外郎著有萬松山

房詩鈔

玉壺山房詩話吾邑潘毅堂中翰久宦京華文章望重宋
莊詩所謂詩多老健不闢年者也自退閒林下足跡罕入
坡市詩稿亦不經以示人無從選錄其猶子伯臨比部暨
難弟棣塹庶常蘭玉森森並工摘藻伯臨吐詞雋朗中含
健氣不專以琢句擅長而如小草沿南閩長松落古雲池
光虛受月雲迹淡如烟日脚光搖水雲頭勢作山獨披泥
雪尋鴻爪閒看松風洗鶴翎仄徑泥封埃石笋濕檐風駐
過墻花體物俱工允堪欣賞

小院

小院淨無暑桐陰青欲流露螢爭火碧風葉借聲秋翹首見河
漢傷心說女牛美人遲莫感未分此生休

臘月十九日偕邱三曙岩張六禎伯七朋峯陳二對堦
立之弟遊蒲湖寺過碧虛觀尋濯足濂泉登滴水岩
望白雲山至暮始返回首 錄一

山迂路漸仄石滑泥始乾如何濕我衣積霧空中園行行過
南道院雙扉間道人種松罷飽看墻頭山我亦看山客相逢一
醉顏詢我來何遲老梅花已殘菊湖水清淺踈影空闌珊負子
驢背約博子登山歡雲山望不極心惴力已殫安得舒健翮快
此凌風翰

中秋夜懷陳對堦

流光照檐楹抱此幽居情今夕月華滿九秋天氣清星榆微有
影露桂濕無聲言念扁舟子關山何處明

次韻毛丈壽君將之楚南瀕行不果感事二首

秋天方肅殺壯士盡函犀風角傳山遠蜺旌入野倂王師沛時
雨行路慎悲嘯指顧嫖姚將功成快戮鯢

獨有南游客傷心嶺外天趁將秋水濶歸泛洞庭船鱸膾償前
度圖書荷一肩依人還作計小住轉淒然

書沙張白再來詩識記後

七十年來未了因殘編重與證前塵可憐敗屋荒山裏不盡他
年得意人

旅懷四首

錄二

酒本驅愁物愁多酒不支故園渺千里遙夜最相思霜氣寒更
峭風聲獨樹奇秦嘉書早達未報草堂詩

擁盡衾裯水吳綿折幾層八簾窺落月照壁顚寒燈城角吹何
急刀頭唱未能長吟似莊舄詩骨已峻嶒

答張大南山

開緘忽憶經年別三復黃花惠我詩寄語客帆南下日草堂秋
雨鴈來時

過董子故里

漢代麟經業何人列上曹玉杯規日潔繁露浥秋高大義天人
炳顏淵柱石牢斯文同不朽故里感蕭騷

渡黃河

落日黃流急行人暫住驂槎迴斜漢北春滿大河南野柳烟光
活官梅雪意酣山程歸尙遠身已再眠蠶

望天柱山

卽霍山

突兀破鴻濛天南一柱雄萬靈朝自北雙闕配從東羲馭臨丹
翠神鰲冠始終幾時青玉杖長嘯倚蒼穹

雨中度馬回嶺

徑闢蠶叢險山迎馬首高雲隨風作障林挾雨爲濤去燕何時到飛鴻不住號長途忍飢渴嗟尔僕夫勞

舟中望滕王閣

高閣鬱崔巍臨風亦壯哉客新愁對酒家近畏登臺獨憶當時體慚無作賦才匡廬青一角容我摘星來

大堤曲

大堤柳老不堪折飛花攪作春雲熱去歲燕南雪似花今年趙北花如雪迴風吹雪晚蕭蕭行人過盡十三橋一橋一度相思影譜入高樓白玉簫

謝豐浦夫子招集越華書院池上觀魚得金字

十載江湖倦客心白蘋紅蓼息沙禽如何秋水濠梁興更此方

池半畝陰萬里天門通浩瀚暫時人海困蹄涔釣竿便拂珊瑚樹不藉懸鈎一縷金

與趙孝廉筠如聯床夜話二首

錄一

宿鳥驚枝影未安玉繩伍戶漏聲殘每憑白酒談方縱不看青萍胆亦寒老我塵轅嗟伏櫪幾時東海快投竿與君且覓游仙夢撒手綠雲跨紫鸞

秋夜雜詩五首

錄四

缺月流素輝萬像脩清朗開軒步前庭夜氣聚森爽尋常三五夕飛鴈列筵徹朋尊詎不樂清興失莽蒼攬物無成心過境有孤賞以茲徹生理心遠業自廣雲鶴翔中天警秋發哀響月缺何時圓沈歎起遐想

玉宇何寥廓上有丹桂林朱英耀秋節白雪鋪瑤岑長風吹天

香墮我山之陰昨夢遊高寒恍惚凌千尋羣仙正高會羽曲揚
繁音霜杵和王免霓裳雜靈禽姮娥顧我笑授我雲和琴彈之
不成調此意逾兼金

跌蕩天門開眾星燦成行二垣巨翼衛五緯時雨賜乘槎昔言
邁遊彼白雲鄉咳唾紛珠璣懷握森琳瑯塵盆頓開豁卓犖爲
文章念非青雲客何爲久迴翔息影歸蓬廬一旦成參商雙星
隔河漢欲渡無津梁

迴風吹壁燈閃閃光欲眩讀我兒時書開卷淚如霰廿載事鉛
槧辛苦鑄鐵硯榮名世所希有道塞不變歌聲出金石緬惟山
林彥一室來古人匪直羹牆見兒時不再來歲月駭馳電勵矣
歲寒心東南美竹箭

臘月十九日集葉農部雲如風滿樓設像拜東坡先生

生日以山高月小水落石出八字分韻賦詩得水字
珠江江水平且泚危樓倒接蒼烟時峩嶨山色古時青直跨江
流五千里先生窮謫來炎方前居惠州後僊耳深思五十九年
非廣州買得梅檀始灑泉叅破祖師禪榕陰書勝華嚴紙經旬
笠屐洗秋光鴻爪東飛一彈指惠人祀公合江樓萬家春酒樽
浮蟻僊人祀公天慶觀建茶香潑靈泉髓今朝江上紅雲起孤
鶴橫空鵲聲喜千樹梅花一瓣香要與先生論桑梓朱顏詎符
老壽耳門吳子凜凜鬚眉公不死靈旗鬚鬚導赤鯉七百年前
此江水

嶺南羣雅

番禺劉彬華藻林輯

吳俶

字載南南海人監生著有增坡山人詩稿

次韻墨峰司馬夜渡春州江

湖光接素秋秋水泛仙舟
江冷楓初落波平雲欲流
青山三載別明月片颿收
往日鳴琴地風烟再過愁

送別陳青崖

如何歲云暮偏欲客高州
別酒不成醉潮聲生遠愁

哭邵南亭明經八首

錄三

昨得何基札言君死可悲
棺衾猶未備殯葬更難支
孤雁淒淒夜啼烏啞啞時
有知魂亦痛逝者竟如斯

昔年余作客赤水避黃巾道遠傳聞誤書來問訊頻數行何繼
繼重讀倍酸辛泉路今安否無由寄故人

淵明曾寄我乞食五言詩裹飯門無客號寒室有兒淚隨聲共
下生與死相期大息雕籠客文章不療飢

嶺南羣雅

番禺劉彬華藻林輯

黃喬松

字鑑仙一字蒼厓番禺人貢生候選雲南提舉司提舉著有鯨碧樓詩鈔

玉壺山房詩話蒼厓少與余同事筆研以家累凋跡鹽筴
暇則仍手一編寄心經世之學往者曾襄事治盜密陳方略
海氛既平自以身居粉榆甘同馮異近與黃香石張南
山譚康侯林月亭段初秋孔熈庭創建雲泉山館於白雲
濂泉間伊墨卿撰記泐銘稱爲七子詩壇亦一時佳話也
蒼厓生平尤篤師友之誼詩筆清俊逸情雲上惜隨手散
佚故所存不多云

夢遊羅浮用郭景純遊仙詩韻

雲烟恍離合兩嶠羣仙棲石扇呀中闢左股分蓬萊丹邱間青
巒瓊葩雜香萼上有丁髻童導我飛雲梯飄忽自茲去不告黔

箕妻一旦騎茅龍豈效藩觸羝三千瑤闕開十二朱樓齊

福地疑嫫媿言謁淹雅士萬里天風來清歌入雲裏同遊者伊
誰俶儻香石子泰泉邈高躅詩孫得祢耳精廬湖在昔雲構屬
後起蕭散弄寒泉飛屑漱玉齒林間彩蝶翔倏下青鸞使

翁耄萬年芝色奪朝霞鮮雲輶降鮑姑天雞叫遠山笙歌動處
處和以清琴絃我來聽仙樂泠泠鳴夜泉振衣立千仞浩蕩凌
蒼烟東溟在指顧南斗相比肩乞得紫芝歸壽母松鶴年

浮雲欲變遷碧草易凋謝仙山無古今遊客忘冬夏道人號瀛
濤幽棲觀物化遺我青藤杖策我雲中駕餉我黃獨苗期我松
下舍從師控長螭風雷歸叱咤

偶過黃仙洞擬隨赤松遊天風欲引還疑是海上舟仙人本吾
宗意興時相投携手入林麓嘯傲娛春秋平潭睇飛清一躍臨

洪流

仙寰有撫呵斬伐忽爲災天喬作塗炭餘燼揚蒿萊賴有賢令
尹存我金銀臺巖谷遍摩挲快倒雲螺杯卧虎守其戶游龍領
其頤飄然登粵嶽下視小九垓四百卅二峰羅列如嬰孩錫名
姬吳嶽嘉爾不凡材時小蓬萊秀民盤聚於木燒炭博邑寧侯
爲驅之吾輩將構葛鮑台祠泰泉精廬于
此家香石名羅浮爲粵嶽
築祠絕頂曾賓谷先生爲記

凝碧泓空青澄心更濯魄毛髮鑒清潭三里水飛白我生本蟬
蛻女蘿施松柏途遇安期生雲陰月初夕仙筵設火棗靈廚傾
玉液蓬瀛話清淺坐對忘機石爲問當塗人何似餐霞客

滄溟湧靈曜灼彩千萬丈東從暘谷升林巒盡宣朗海水立眼
前雲壑作奇響髣髴扶胥遊三更渺幽想朝曦浴洪流神珠弄
仙掌嗟予厭俗氛豪懷每來往世外得奇構寰中息羣象戀茲

雲水綠勝結臨淵網

髻齡好探幽壯志未傾頽斯遊原幻渺差足愜襟懷雲端馭神
駟耳底訇晴雷蓉裳載月遊芝蓋隨風迴仙禽爲我喧丹局爲
我開煎瓊花瀉地煉液雪成堆俯瞰冥茫中醜觀令人哀

雲泉山館二十境

錄八

北園

片雲挾泉飛雲歇泉不息泠泠暗泉聲澹澹寒雲色園林小平
章攬勝雲泉北

通泉

濁流遶山脚清流出山腹激濁以揚清不愧通泉目幽人日抱
甕前山栽杞菊

松臺

陡如登天門雲霞度歌吹又如遊閬苑衣襟襲蒼翠風中一鶴
來應是瓊臺使

環碧樓

自有元龍卧不須高百尺萬木環抱中浮光動四壁午夜傳霜
鐘一聲破濃碧

注經窩

吾宗泰泉孫淵源湛經術山水寫真性天地歸著述數點梅花
香露滴研硃筆

索笑檐

凌晨遶迴廊幽花着寒色抱臂入林下高出衆香國蕭然世外
姿顧我如相識

穿雲逕

人行雲亦行人住雲未住杳不見行人但見雲來去盤曲入層
雲人聲落空翠

坐月坡

待月坡上坐月從坡下出傾翻水瀉銀錯認昨宵日朗如玉山
行遠照藏蛟室

集雲泉山館同譚康侯張南山家香石卽送康侯歸陽春

我聞蓬萊夜半飛左股風雨離合神仙府朶雲飄飄下南瀛臺

開金銀宴瑤瓊羣真初集芙蓉城譚郎秘書來上清

康侯自顏
爲上清秘

書卽作瀛左二
字額于山館

振筆疾書字如斗蛟螭驚遁雷霆走天風忽欲

引歸去梅花留君君且住舊時江總酥醪主胸懷好奇尤好古

身外題身三昧圖夢中覺夢一坏土

酥醪道人江瀛濤出行樂
三昧圖索題又松竹壑爲

道人埋
衣冠處

我家香石本黃石處處鴻泥留爪跡霏烟霏雨寫有無

是日香石爲康侯作烟雨覓句圖仙草仙花住寒碧何當更從赤松遊謂南軒

冕敝履輕王侯俯聽顚瀚澎湃之銀濤高躡巍殺縹緲之朱樓

齊烟九點渺一粟塵寰瞬息空千秋不知大羅衆高侶彩雲今

日會何處模石豐浦有約未至一枝持贈春色好拍肩笑向譚郎道君今

歸卧南山陲記取瓊林春最早

觀閭魚歌并序

楚俗亢旱以茶蘼毒魚網利名曰閭魚瀧河上下數

十里燈火燭天男女襍處余丙寅秋客瀧夜泊見之

作歌

天昏月落雲黯愁經瀧有客停孤舟忽覩燭光四閭集喧呼遙

出瀧東頭千人萬人走沙岸遠火近火明潭湫一江腥氣惡風

作脩鱗頰尾翻沉浮大魚昂頭類哀泣小魚閃目隨奔流籃筐

在手紛攫取嘔啞曼曲爭相酬初疑徭洞赴夜市又疑海國張
俳優燈光漸散人影亂青燐熠熠蟲啾啾我聞不綱聖垂訓貪
殘最苦苛誅求數罟不入自有禁茲乃網斷胡弗伴一民一物
慮失所忍教淫毒流荒陬何堪旱乾越一載億兆如此魚何尤
明朝舟子論肥美令我廢箸增煩憂

題珠江春泛圖

春風吹遍桃源路春水方生桃葉渡桃花灼灼自成春烘出紅
霞釀青霧羣仙高會華筵開木蘭之棹天上來一聲欸乃破烟
水千枝璀璨明林隈浮雲過眼變今古春夢離魂來倩女又疑
天女手拈花花飛無主愁無語美人霸業總茫茫此地空留一
樹香生塵羅襪輕盈態洗雨梨花淡淡粧鏗鏘津鼓催舟去掉
入禪關最幽處咒鉢看生並蒂蓮慈雲長護恒春樹江波幻渺

近如斯曇花雲現是耶非笙簫羅綺耀金碧但見深樹斜春暉
我家山谷製圖卷都官更妙青詞選玉樓回首最銷魂十二珠
簾幕初捲

李秋田見示春聲洞天福地各詩集賦贈

君家謫仙老青蓮芙蓉出水相澄鮮西崑哀艷傳錦瑟縫霧裁
雲工組織王孫奚囊貯佳句叱咤風雷歸指顧卽今程鄉稱李
子鐵篴梅花負奇氣瓊瑰貽我數卷詩筆欲扛鼎眼如箕華堂
春酒圍絳雪青燈夜雨題碧血曲江英靈尊俎豆海聲才人環
左右

秋田闢海聲堂祀曲江以下二十六人

蒲團參破野狐禪霓裳高會大羅仙

避器近策雲中駕璇室瓊臺容暫借凌虛飄飄樓作舫逸情迴
出層雲上愛君雲船讀君歌

秋田今夏養病白雲倚山樓作雲船歌

如乘貫月橫

銀河排雲更謁金銀闕

秋田適游羅浮歸

簫聲吹送寒梅月憑將君家

絕妙詞譜作廣樂歸天墀

木棉十首 并序

宋代月泉聿開吟社迫湛若鸚鵡樹幟騷壇美周牡
丹掄元香國風流已往韻事遞興木棉移從西番挺
立東粵若木南飛萃丙丁之秀氣炎郊正色繪祝融
之精神攬茲瑰異合徵歌詠爰效引玉聊寫遊踪賦
海嶠之奇材自慙葑菲增藝林之佳話廣集琳瑯

撐空一柱勢崢嶸萬古神祠矗太清遙擁東皇來紫氣特開南
海煥文明龍天許出娉羅籍鳳閣爭傳吉貝名曉日瞳矐雲水
澗藥珠宮在錦官城

南海神廟

海若朝天出海門颺馳電掣火雲屯鼉峰日聳紅爲馭鱷浪霞
蒸紫作軒岸幘絳城來木客衣緋貝闕見龍孫置身霄漢層層

迴萬道祥光拱 帝闈鎮海樓

卿雲糾縵治春臺火樹離離照水開赤帝天邊飛舄至絳妃江
上弄珠來橫波乍度驚鴻影孕月真成寶蚌胎從古輪囷多崛
起中流今有出羣材

海珠寺

珊瑚成陣鬱琳瑯陸賈城餘劫火光南國繁華偏霸氣東風添
續大文章蠻烟蛋雨紅橋外瑞日祥雲翠道傍碧草一坏空漢
土丹心千古照斜陽

粵王臺

旌旆飛揚卓不羣飛來錯認絳將軍一天血灑衝淫霧百戰心
雄擁陣雲處處明珠猜惹苾山山烽火淨妖氛朱崖百仞標銅
柱爭比冲霄大樹勲

伏波營

星精骨格自桓桓古井奇光得大觀花雨彌天成寶相風雷中
夜轉金丹扶桑遠作連枝勢若木低從下界看疑是安期遺棗

在白雲簇遶絳雲蟠

安期鍊丹井

朱明洞府耀真天寶樹凌空勢欲然四百芙蓉齊絢爛三春蝴蝶門蹁躑石梁虹現來神女丹竈霞封渺稚川絳節朱旌相縹緲彩雲何處會羣仙

朱明洞

天風輕捲紫羅裳卓立亭亭水一方海市夜開懸寶炬仙山春宴集明璫涵虛盡奪雲霞色亘漢平分日月光試上妙高臺上望江神應拜萬花王

小金山

劍氣稜稜燭斗牛柯公遺迹著靈邱乍從青闕朝丹闕厭住瓊樓愛絳樓杜宇啼殘紅淚迴驪龍睡起寶珠浮春山一片光如火髣髴朱旛出石頭

鼎湖半山亭

龍爭虎戰怒濤撞閃閃靈旗耀大江百折根盤魂不散千尋骨立氣難降孤臣血淚塗丹壁才伯精靈聚寶幢忠義文章光焰

在天教正色鎮炎邦
三大忠廟

嶺南羣雅

番禺劉彬華藻林輯

簡厥良

字進思一字夢巖順德人諸生著有沃心齋詩草

甘泉洞

散人索居心苦隘鎮日讀書唇舌乾甘泉洞古引幽興首路十里松風喧春流活活塍際響新秧剡剡波前翻平疇歷盡石當面絕頂坐可三人寬同遊三人披襟解帶語移晷似有琴筑來潺湲打頭風勢毋乃惡小雨送我青雲端懸崖穴出地脈發一綫放溜無朝昏其用愈大流愈漸豈必萬馬誇騰奔由來寒泉比吉士不食心惻泉非思所嗟上流苦相值涇渭一雜難尋源眼前質乃莫自保身後行果誰能完行人指點尙書院遺趾但見蒼

苔痕江山顯晦本無着此水竟以公名存清風吹空水沄沄勝
遊偶發雍門歎舊聞此水味獨異負汲恨不携青猿作詩調水
山神言予亦辭山還閉門

四月初三夜聞蟬

倚遍危闌酒未醒朦朧芳樹忽蟬笙他鄉節物關情甚記取今
宵第一聲

四月初六夜書事

中塘孤村江之湄小市冷落無豚雞於人無求物何取夜半巨
浪排鯨鯢雷車鏗鎗大地裂雁戶奔走蒼煙迷火城蔽天賊何
所但見百艘環東西利矛過身刀在手欲進未進艱長堤輓轡
一聲看墮箭蒙衝幾處驚然犀防姦誠先防火後賊會鼓掌居
民啼靈神廟古閉老幼環而陣者兵皆揀徐分勇健各守隘賊

騎未敢輕長嘶揚帆似聽礮車響金丸蕩漾青琉璃嗟爾么麼
本無用腹餒欲飽官倉稗內河竟敢恣馳突深入得不時日稽
近聞將軍志航海水師大隊人力齊閩浙樓船亦已下要使澤
國忘征繫將無獬犬思反噬或冀網漏翻排擠新造前轍那可
踵熟道儼駕輕車躋貨財縱未壓騾背標掠已覺憂魚嫫西州
相去二三里幾夜燕雀無安棲客居萍梗任所值尙有餘慮哀
黔黎故園去歲驚亦數聞警便恐愁阻暎明朝寸紙報無恙嗟
爾么麼甘噬臍

送別家浮峰卽寄懷家兄永之二首

腐儒戀蓬蒿遊與學相左終歲不窺園識見亦瑣瑣江海恣澎
湃山岳鬱嵯峨苟能攬其勝竊謂不學可而況良玉堅試之須
猛火艱難閱長路筋骨勞重荷同行瀛洲仙翩翩髮雲髯詩豪

得昌谷笑語雜喧

謂黃在巷太史李漱六孝廉

憫彼驚蓬旋未廢攤書坐

酩酊知是誰周旋寧作我行行別鄉關一縱凌風舸

別子自無奈憶吾兄別時

謂永之兄

挾策志北走鍛羽翩南馳家山

席不安西上藤江湄是時子兄弟與我棲一枝入世悉苦辛作

事同然疑陟岡每有懷賴子忘吾悲歲月去如夢又作今別離

別離亦常事功名君所期功名亦常言脈脈看臨岐子行不可

留吾兄未東歸丈夫志四方安川惘惘爲行止各努力雲樹長

相思

題家漣漪畫梅用東坡松風亭下梅花盛開韻

我家龍江之東村異時別去勞夢魂沿隄桑葉採靜綠傷琴獨

往忘朝昏長吟未築水部閣數畝近闢泉明園海南仙雲入寤

寐一枝種恰乘春溫

庭前大梅一株今春自羊吸搗得

無花無雪樹亦好疎影

留得啼晨嗽似聞松竹喜相慶頻見燕雀來欵門高人寫生畫
有態天女入畫花無言花耶畫耶我與子且倒家醪傾瓢罇

嶺南羣雅

番禺劉彬華藻林輯

劉濟之

字湘浦番禺人諸生著有璞雅山堂詩稿

玉壺山房詩話吾宗湘浦爲徐醇夫孝廉弟子又受學於余作詩意匠經營體裁拔俗充其才力真能使前賢畏後生也

七星巖紀遊二首

星巖信奇觀幽險吁可怕何年帝斧擘坼此雲根罅穹窿氣鬱勃盤曲石碾砢黝然竊而深白日忽西下束炬然松枝火光冷不射芒寒况冬令頃冥正司化陰凝泉不消股栗步難跨仰見石龍蟠疑動之而乍寧知炬搖爍光影適相詫蒼鱗汗猶濕石乳雲欲瀉展余壯遨遊勉願策高駕龍乎爾神物導引幸憑藉

天罅忽漏光入巖曲而左載登璇璣臺瞻仰大士座靈宇頓軒
豁塵淨不可唾雲氣霏繽紛鳳翅垂婀娜經營慘意匠剴鑿豈
錘銼我疑亦龍室龍去穿壁破千年剩闕迹滿壁尚蘇沅仙靈
永窟宅風雨長守邏冉冉緣陰動謾謾松聲過與酣漫小憩未
懼龍歸卧偕遊偶童冠歡呼雜行坐長歌震巖巒答響遠相和
長至日閱江樓憑眺

端州古形勝山水懸清光江樓四望徹高覽窮八荒客途值長
至物候欣回陽凌晨快登眺雲物徵機祥危簷聳銀漢壯宇飛
虹梁鱗次俯比屋左右軒重廊北屏森奇峰後閣巖文昌三台
鼎雄峙七巖星低昂觀山此選勝挈領還提綱何人扣銅鼓震
地聲雷碾前夢枕江濤江源來夜郎中連蒼梧波上控牂牁洋
奔洩千百支澎湃大小相環爲郡襟帶東以峽鈴羊斯樓如建

佩屨氣白日旁塔搖雙虹吸峰立千雲翔憑闌意豪放奮袖神
飛揚眼前碎黃鶴誰是青蓮狂平生慎跬步未免輕垂堂舉手
拂烟霧垂手低帆檣陽烏忽欲墜林巖渺然蒼何當仗長劍追
日還扶桑

寒夜詞寄仲兄堯山

屋角聲如濤萬里勢辟易簷瓦飄鳴金窓紙碎裂帛布衾冷蕭
縮旅夢愁輾側寒燈剔燄長凍筆呵指赤腸肌坐輪轉語險搜
韻窄作詩欲何寄吾兄久行役三年一省母匝月復爲客兄昔
如弟年負荷勞薪析門戶歎中微努力繩祖德父慈昔見背弟
幼猶未幘艱危翼使成苦心潰全力十年賦隨行五載濶離迹
雲合渺難期雨散不旋刻弟船江波去兄馬關山適兄去弟相
送弟行兄未悉月前家函寄字寫兄某泐上問老母安下數生

計拙寧知弟已出草字家不識客愁角吹成鄉心月掛壁寒夜
緘此詞長跪告相憶

謝家樸石兄惠柑並及前兩紙之贈

憶昨惠我雙柑佳色味香潔珍瓊瑰剖之自食心未忍袖之擬
學懷橘懷君仁那得便深察筠籃捆載黃滿堆飽嘗兼使餽老
母真乃錫類心能推迎門稚子歡如雷相與發篋爭兩枚傾盤
豈異金燦燦燈前笑映慈顏開偶逢佳果思深杯呼兒酌取傾
新醅前遣稚黍兩瓶酒愛惜未忍輕酌鼎聽鵬漫擬步東郭馨
膳且喜循南陔膝前剝果兩子婦並皆拙飲無能陪此時月艷
照屋角老母酒酣淚傾落憶昔而翁早入幕結交投贈紛相錯
十年門庭冷如冰臺輿無饋嘆蕭索高人雅誼遇汝厚汝當善
事如我約我時含淚跪且諾負米深慚饜蔡藿平生未動真感

激此愛深與肌骨著

題謝芸隱先生聽瀑圖

天風蕭蕭山谷鳴一室靜滿乾坤聲人生遇物欣有得何處不
似蓬壺清天籟入耳酣鐘匱幽趣欲繪煩丹青銀河冷瀉秋影
潔高懷冰雪何瑩瑩清空雷礪玉漱齒急雨寒雲四山裏動中
有靜理可會高人洗心不洗耳碧霄遠奏鈞天韶誰辨宮商與
清徵山何芒天何咫尺流不作東山起胸中礪礪平如砥平生
讀畫畫外旨玉琴無絃音在指寸膠澄澈黃河源萬古高山響
流水

嶺南羣雅

番禺劉彬華藻林輯

劉廣禮

字德亨一字寅甫番禺人優貢生著有少游詩草

玉壺山房詩話吾宗長甫寅甫智孫兄弟翩翩競爽以詩才論智孫當爲馬氏之白眉而駭四健六寅甫尤長秦小峴司寇賞之有羨子才華爛若雲之句

送歐厚村培之官陝西

今長安去古長安言作雄藩首領官折柳有情須盡酒積薪無慮好彈冠潼關四扇驅車出華嶽三峰立馬看併入行囊詩筆健虞衡集後壯波瀾

一 江行

江行鎮日作南風湖水漫漫望瑞洪客況不忘驢背上詩心多

在雁聲中二千里計鄉猶遠二百錢沽酒已空一抹殘霞閃金
碧漁家晚飯柁樓紅

三月晦

纔道將離酒易乾落花如雨颭闌干可憐一夜殘春意猶作窓
前料峭寒

南歸雜詠七首

錄一

又坐藍輿度玉山彌天風雨護烟鬟江南桑柘村邊屋盡入濛
濛濕翠間

嶺南羣雅

番禺劉彬華藻林輯

劉廣智

字德明一字季子番禺人諸生著有簾青書屋詩鈔

應元官訪香石師寓齋不值

緣梯陟上方紺宇鬱重起一桁城外山秀色隱窓几虛壁生雲霞連床積書史時聞疎雨聲空階落榕子

夢醒

夢醒聞人聲又似飄急雨起視星在天疎篁打秋隲

夜雨

東風吹雲雲作雨雲頭黑處千萬縷四圍老屋螭龍蟠一夜寒堵小蟲語蟲聲雨聲相雜鳴非絲非竹淒且清幽人欹枕閉門

聽篋床布帳燈熒熒夜闌夢覺聲亦靜仰視長天飛月鏡

立春前一日蕭綠墀

吳基

歸里不及親餞詩以送之

春風一夜起隄柳幾行生欲待先攀贈如何君已行寒雲低海樹細雨暗江城天末歸帆影悠悠共此情

讀離騷

秦楚縱橫際瀟湘放逐愁投身魚腹日進諫虎狼秋一卷離騷作千年大雅留月明今夜讀山鬼泣啾啾

三月三十作

烟樹霏微雨似塵海棠花落燕泥新可憐隄畔千行柳送盡行人又送春

嶺南羣雅

番禺劉彬華藻林輯

孔繼光

字開文別字熾庭南海人諸生著有濠上觀魚軒集

玉壺山房詩話熾庭尊人復之明經少與余同游洪瑤圃先生之門賞奇析疑殆無虛日性情坦率雅慕茂先博洽藏書日富屬文亦日益工楷書及中年進理玉樹今熾庭能讀父書詩句清妍兼工聯體超宗殊有鳳毛余每見之輒思故人

不置也

懷羅浮

蓬島南飛日迷離四百峰羅陽一灣水華首幾聲鐘風雨空遙想神仙不易逢何時恣來往天外數芙蓉

花田覽古

素馨斜畔接平田一片芳菲挹露鮮霸主留香餘尺土美人埋

玉自何年殿中銀柱三千仞河畔瓊葩廿四傳白雪豈堪歌樂
府紅雲曾與侍官筵塢延殘照陪雕輦橋逐春波墜粉鈿絕代
風流人已渺滿江花月汝成仙長阡寂寂空衰草荒塚蕭蕭怨
暮蟬無限冰魂招不得數枝猶帶漢宮烟

珠江春泛

并序

十里江天幾重雲樹春衣欲試春水方生采香杜以
何之攬芳洲而遠注則有蒼崖先生鶯花簿領風月
神仙爰招朋儕相賞泉石青鐫畫舫阮屐奚囊於是
離曲渚放中流波光接天雲氣薄岸賦桃根而意遠
指江水而情深分楊柳之陰酒旗一角問芙蓉之渡
春漲三篙客或箋擘輕紅杯浮大白灑翰流潤含笑
奏懷莫不擊楫風謠停橈烟間乃橋亭暫過香塢忽

逢藤陰對門塵影撲地易舟而步無處不花香風襲
衣流鶯轉檻我譜落梅之曲誰吟飛絮之詩芳草落
英有時迷路小山叢桂是處留人旣而烟外漁謳村
前日暮帆影將轉鐘聲忽聞歸途訪大通寺焉柏陰
叅雲竹影翳日將論禪悅時聞妙香乞詩松牌寄卧
蒲榻尋源欲竟穿徑而行井古無波亭空宜雨折松
枝而當塵叅玉版而談元則又游詠無方色空兩悟
者矣嗟乎水天終古盡閱繁華詞賦幾人興懷俯仰
昌華苑裏芳春園中白雪歌殘紅雲宴罷問甘泉故
苑碧草紅棉弔素馨芳魂斜陽古渡神心妙遠叨陪
杖履風流山水方滋况假陽春烟景爲圖主客端在

吾師

謂香石師附紀篇章愧予小子

芳草一洲晴垂楊兩岸平天圍雲水濶春送管絃輕與客揚舲
去看花載酒行綺羅珠浦麗環佩海風聲碧玉中流寫朱欄倒
影明香分金谷地斜擬玉鉤名瀟洒滄洲意清涼佛國情霸圖
山色裏回首尉陀城

薊澗

雲泉山
館雜題

一澗紅翠飛籬邊風自掃寄語素心人來玩此芳草

南雅齋

大雅久不作南中繼越吟小築自千古君聽山水音

索笑檐

明月携鋤後天寒鶴未歸檐外共談笑仙雲墮翠微

幽篁裏

薄暮碧雲圍獨坐沙幽想何可無此君迎風作清響

嶺南羣雅

番禺劉彬華藻林輯

徐青

字又白嘉應人布衣著有聿修堂稿

玉壺山房詩話又白傳聞強識於詩酷嗜昌黎歙寄魁崛如其人所居曰象湖甚僻不求聞于世齊昌都尉湯雨生重之延爲上客嘗云程鄉得一詩中龍李秋田龍頭徐又白龍腹顏淵帆龍尾三人固莫逆交也

鸚鵡碑歌并序

昌黎草書王右丞白鸚鵡賦真蹟雍正間潮州太守龍公爲霖得之羊城因勒石祠中或云此米元章書所祖也昌黎書不多見所見祇此碑及陽山鳶飛魚躍四字而已歌以紀之

海風吹破蠻煙昏奎光夜燭南天門一朝大儒謫荒域斗鑿頑

障開渾茫真書大誥迪矇瞍昌黎教化真如神至今祠祀東山
麓時有野老羞蘋蘩祠旁古碑嵌兩壁墨花繁贅無苔痕僧言
書是韓公筆龍公太守鐫貞珉法兼行草字奇兀老樹樛結盤
霜根古釵屋漏相斷續王維賦筆增斑斕退之二字更奇絕斜
拖鳳尾梢騰騫又如空中捲風葉欲起忽落飄紛紛或言米顛
此師法追摹得巧忘蹄筌昌黎文章遍天下希餘墨蹟藏人寶
淋漓大筆九州橫去聲豈與王庾爭輕軒詩成擲簡不自寫惟令
阿買書八分固知俗書非所屑脫略細務操經綸精奇到底弼
必發隨意弄筆皆超羣譬如大將具神力餘勇亦足摧三軍試
看壁上蛟龍走兀傲氣象今猶存名賢手澤世所寶一石何啻
千璵璠精靈夜半閃光怪恍惚神鬼來捫捫我昔陽山看碑版
摩娑四字來往頻瀕行手榻得數紙什襲藏弄逾家珍豈無晉

唐諸老帖蠹魚剝蝕俱泯泯與公千載一投契對此不覺神明
親昔公登探岫巘跡猶勞搜索悲徠嶺公誠好古我生晚安得
追躡窮崖垠

韓祠落成歌

火維赤熒怒攸居重離繼照陽明區滄溟耀明明月珠寶貴孕
毓英奇儲泰山北斗仰規撫遡厥初生民睢盱榛榛狉狉羣鹿
麋漢立君長搖尾餘侏僂離結俗疎靡洎魏六朝迄唐初渾厓
紛屯拏可吁喜則酣談怒諷諄格門睽睽搦戈及祝融恚上訴
天都帝愍蚩氓亦孔愚矚其逞哉五教敷僉曰韓子擅聞譽帝
曰俞汝誠通儒勅汝馳驅領海隅免茲芸芸耳目塗錫汝金簡
書五車高文詰屈艱茹咀決其齟齬相灌輸退之銜帝命犇趨
令趙天水集生徒遠究義皇說唐虞聽衆領首心懽愉負者釋

擔農輟鋤填門塞戶摩肩牖公曰今上崇詩書迎枚鄒以蒲輪
興文如楊雄賦相如立召金馬承明廬訐謏子非冥頑夫民飲
斯言猶醞醕剔抉胸膈夙荒蕪嘔濁垢沫餐經腴學海齎滌樂
涵濡八月教澤淪肌膚北騷人去南人忤思公何以慰煩紆意
溪之東山之岵遺植橡樹盤根株攀思道貌追睂鬚繚以垣墉
構以櫨以肯肅薦羅肴蔬祠雲蒸騰翔斗樞颺風不興巨鱣驅
連天漲海波瀾舒毒霧瘴氛潛消除公靈將其安徐徐潮煩淫
祀悅浮屠崇奉罔惜糜青蚨矧公訓士流典謨聿新廟堂豈曰
諛斯役鼓舞者誰與大原觀察之勞劬

遊潮州鳳凰山

生平愛山心膠結不可錐凌晨跼屐行朝日露未泣初行越平
畦綠草滑且輒頻行渡山溪秋水清且淺濱溪有歧途欲問語

難辨似云東北行有山門可款危橋支兩木愿縮艱履踐興劇
步斯寬翻覺道坦坦老樹二三株枯根罩苔蘚古藤修如虵蜿
蝻蟠山間崙田數十畝流水注竹筴匏瓜大如瓠臃腫塞荒陲
蹋磴凌崔嵬屏息不敢喘循崖步屢側盡處獲平行迤邐度石
門山勢復旋轉越轉越幽奇愈高愈塞產峭壁裂寒泉直瀉春
崖窾陂陀稍欹曲崩圻路忽斷攀躋防失墮赤足趨嵯峨塌塞
出叢林鳥聲餘睨眊層巔望已卽造極遂忘反峯頭有雲扃終
古未開展風掀露半面頗得恣睢眊長江天罅來一綫千山綰
山多細莫數礨磊羅盎甌齋滌大海潮南望殊刮眼微開巨浪
湍巖谷暗搖演是時方秋初殘暑退未半天風吹嵐氣寒痒思
重襦捨身搜幽觀餘勇祛疲蹇狂歌咎咎音體志委閒散出山
窮野趣落日歸晚晚山人導我行淳意稍繾綣茅舍多疎落蓬

門無扃鍵輦民四五輩胸袒目雙轡客問何姓名以手畫地板
或言宋遺民逃元竄僻遠至今五百年租稅免征繕生涯無別
營射獵足彪彪餉客陳山修邨醪酌盈盈斯誠太古風沕穆鮮
欺誕明晨相送行十里始分伴回眸看山容白雲白舒卷

石溪

天公擘星作奇弄隨手方員擲虛空因風吹落閭廣間絡繹中
流鎖潭洞厥形變幻殊不測或百爲羣三爲衆鄞江柳南來
勢欲洩下注尾閭忽無縫鑿開一線略通流紆折于迴始奔送
鐵門崿崿觸雲扃上有嵌巖作梁棟絳纒擁積波濤高泐然斗
落千峯動颯空急雨帶颺喧頃刻寒生六月凍壑慳豁曲風雷
深一穴窺天小如甕灘聲閤雜鳥聲小穿石層層得高巔露猿
攀臂飲澗谷百丈及泉愁凍從我從人峽快幽探便擬搜奇恣

豪縱獨行翫翫十五里處處仇池足清供欲窮窵穴阨重巒云
有羣仙跨鸞鳳越磴凌梯遠窺瞰綠樹陰濃雲霧重入險不知
出險艱一蹋滑苔一驚恐側身蟻步歷荒礧暗水流花滴琤琮
緣坡驟下路陡絕懸崖峭壁藤蘿縷中間亘接雙石梁直渡寬
平勝磨礪橋南碕岸夾槎牙老松蟠結何年種閒花野草不尋
常幽香都入騷人誦笑彼閑夫飽啖嚼甯將脚力知何用峯頭
白鶴愛羣飛憐我獨遊寡陪從不知吾心自有得樂哉何必窮
途慟

遊朝斗巖

在汀州

劃崖納幽景刮目開新境環山有白雲石室掛雲影雲去巖谷
寬雲來襟袖冷撥雲坐石上收視得深靜洞門漏日色照壁光
罔罔古篆蝕苔紋點畫失完整剔刻露稜角欲誦口猶梗坐久

條紛煩消悶忘日永深林百鳥聲入耳背井井亦有流泉音瀾
瀾灌佛頂諸仙棲岑寂神明肅清耿僧言卜琰靈我獨不敢請
惟有方寸心默默自猛省俗腸未蕩滌豈得超高迴茲巖云朝
斗便擬窺溟滓所嗟畢雙足遼廓限馳騁但見北來峯負絕越
平等爭馳赴閩海嵐岫霾荒憬近矚九龍山屹屹象欽鼎溪光
寫入懷清淺見藻荇沿溪撐矮屋遮籬滿桃杏茲鄉雖遐陬物
色餘秀靚薄遊歡屢尋遠攬愁每屏下山趨別途蹤稀草沒脰
縈紆歷險側涉足始平促暘道憇旅亭夕陽下俄頃

山獐行

非苗非獐非狢狢詭厥狀貌殊形骸面倅鍤釜堆墨煤掠髮拳
曲髭髻鬚綠眸睖睖數環迴耳弗雙環若重鉞雉尾斜插髻歲
裏腰繫囊荷錦繡堆結衲藍褸羽毳毼肌膚腥臊聞者喚裹脰

束髀足不鞵踰嶺越嶂捷驪蹶背負藤竹雜梁稽趨市烏集百
千儕交易籌算多虞猜聲音哢聒語猥欵醉或號呶爭喧逐聞
昔自宋紹興來乃祖槃瓠實葵胎醜類繁衍散天涯芟艾荆莽
披草萊劈崖鑿瑰麥黍栽以長以育滋生財所乏布縷及鹽梅
支流判渙分八排倚嘯巖谷盤崔嵬獵麋飲血啖蚺虺男女自
擇非關媒厥心疾狠如狼豺生鐵鑄劍藤編牌鏢刀竹弩教嬰
孩往往作孽倡渠魁貔貅所觸蠻鋒摧諸酋投首蒲伏哀念其
無識俾自裁剩卒殘兵俱招徠設衛防守立烽臺羈縻令勿爲
禍哉 熙朝德威訖九垓要荒和輯重譯諧同履王土歌康哉

惠州西湖

有序

予三至湖上每詠未足以竟其勝小志載前人名詠
良夥然亦無有壯言之者興之所至偶效昌黎遊覽

作法爲鋪敘如此或有陋其瑣冗者耶

山盡天南走水到天南湊川爲豁其流湖以蓄其秀大哉造化
功何時開鑿就或云混沌初蛟龍此戰鬪龍困蛟亦疲各竄歸
淵罔尾髻所踞跋今爲穴與竇爪角所擊觸今爲泉與溜天爲
開其宇地爲發其覆東西兩江水此地乃交媾湖南匯衆流收
納廣而富西山絡繹來擁抱羣輻輳泉紳拖高峯俯激注屋雷
當春雜新潦傾瀉尤急驟浩浩橫槎源始出穿石竈演流漸瀾
漫蕩潏動雲岫北岸維巨防邛闕無滲漏蓄洩憑尾閭畫斷卦
象姑其東迴鵝城十里廣延袤湖波日滌蕩風物更清茂長堤
跨西新雨水悉通透潮平湖岸濶深淺誰測究有時忽晴雨無
端變昏晝陽侯騁神怪頃刻異狀候初遊屆暮春山骨未寒瘦
湖光儵澄澄無乃巧相遘寥天張鏡匣濯濯鬚眉靚藻采逐雲

流紛披餘纈繡清颺微拂拭猗靡波紋皺峩峩泗洲塔倒影拍
星宿義義象頭山俯浸礙宇宙梵宇依湖曲寥窈巧結構拍水
開烟霏凌波見靈鷲忽聞湖上花馨香拂襟袖定有遊春人掇
佩萋蘭揉又有湖上鳥馴習互敷敷輕漚隨出沒宛轉弄清珠
我思西湖勝應不減鶯脰景此南越區得名乃獨後不有蘇子
瞻山水誰刻鏤想當造物心特遣闢荒陋題詩勸湖月桂酒歡
自壽占得惠州湖不羨杭州守湖山得公賞嘉願亦已副知己
原無多相遇只邂逅邂逅存遺蹟斯人不可又西湖應愴別追
憶如故舊

題李秋田

光昭

鐵樹堂詩藁

于山觀羅浮變化陰晴促于水觀珠江跌蕩雲雷逐于詩觀秋
田神行無拘束不期山水趣乃在文人腹胸中原有詩腹笥羅

卷軸意中本無詩性情隨感觸味在有詩間字句包珠玉味在
無詩間言外多含蓄欲知色香佳芳菲九秋菊欲知色香淡優
鉢曇花毓秋田本名家扶輿鬱清淑霽然忠孝情飀風轉春煥
小小樂聲詩有如嗜藥麴六籍作笙簧百家供沐浴寢饋二十
年沈浸歸濃郁液自子史傾芳從騷雅沃譬如蜂釀蜜窺探百
花簇又若煉金丹搜采百藥屬體製從心裁雲錦任杼軸邇年
饑寒驅塵車奔歷鹿所閱江山奇益張伊心目著爲扶胥唵天
雞叫晴旭金銀龍蜃樓羽葆神僊族獨立島嶼高下看沙鷺伏
誰浮伯牙船願聽成連曲號召仙羊城雲中揮寶籙在昔屈陳
梁嶺南三鼎足詞壇縱騁馳藝苑高踴蹙如君海上謠古調今
猶續笑他拘迂儒爲文限邊幅臭誤神奇秣糠雜菽粟雖沽
一時名越世同草木君今力復古著作盈箱篋滿把琳瑯姿堪

貯羅浮麓堂以鐵樹名不逐時花縟千秋翹雲林老幹撐空綠

晚秋偕陸春圃

樹英

李東田

士楨

李秋田

光昭

黃香石

培芳遊白雲山

白雲卓爲嶺海雄蹕空拔地盤控瀾羅浮萬仞擎一股力拒巨
浸遶溟東歔高鬱霧變晴雨驚颺呼洶遙撞春海天平波一萬
里得此亦足撐南中百千培塿環拱峙自然屹立殊尊崇高秋
攜朋陟絕巘俯瞰眾嶺猶兒童蠻夸大長踞百粵殿陞肅樞羅
羣公南斗入地更出地列宿輔弼胥服從中原諸岳隔雲海豈
能遠壓摧危峰清泉白石覓世界闕寂神鬼棲仙翁穿林越澗
探突與巖間謾謾吹松風登高大嘯者誰子陸黃二李聲摩空
鯨鏗鸞陰霧豹咏豪氣兀傲吞長虹人生萍梗跡靡定賞奇攬
勝難常同此日高會足可惜酒酣悲樂交心胸就中小放

春圃
一字

小興尤劇長嘯流響成商宮自詡平生足幽願東歷泰岱西崆峒葱嶺蒼茫雪山白黑山慘淡燕支紅險歷三危九折坂出塞入塞勞匆匆春圖嘗出塞居伊犁年餘此誠造物厚遺贈收拾山水賦詩筓今我渺見褊眼孔雖有奇蹟無由逢若能呼吸通帝座豈憚負走追蛇罔願得菖蒲九節自服食忽與安期跨鶴遊壺蓬

長歌六十三韵題李輝山

瑋

文叢桂山莊圖

有宅有宅城東隅竹籬松棚繩爲樞野花蕭條三兩株厥植桂樹獨扶疎前臨溪水清不汙一畝環堵寬有餘有客飄然來徐徐仙風道骨世所無棕鞋笏笠衣六銖雲霧飄飄襲翠裾修態空中白鶴舒行裝劍珮古琴書笑指桂林乃吾廬欲進未進稍踟躕兒童却顧懼且呼問客何來來何居先生莞爾笑曰吁我乃僊人名子虛若駭若諧胡爲乎入門斯須未及鋪急步庭砌

盼躊躇仰見萼萼紛榮敷綠葉掩映枝相扶淮南小山將無殊
觴花命酒酌屠蘇繞膝孫枝牽衣柳松公酒杯將公賢公喜大
噱歡以娛念昔忝遊歷道途秦松東挹五大夫太華西攀十丈
芙南入三湘弔三閭紉蘭扈芷掇蘅蕪餐英嚼華若膏腴騷情
往往傳江湖美人芳草歲月逾我亦遲暮賦題與牡丹富貴我
弗如團團桂樹聊相於我聞公言心迴紆緬俗良楮滑可忤維
山有檄隰有棣資菴蕭艾雜萑蒲薰蕕氣異疇分區先生獨標
清峻軀余情洵芳匪或渝因樹作屋蔭華琴咏招隱辭叶吳歈
陶情寫心胡不愉園林蕭瑟處鷄或飲或啄忘駭虞有鳥雙
雙鸞鳳雛長君秋田次君
子健俱擅文譽文章絢爛輝朝盱婆娑樹下健翮儲
昂首直欲翀天衢廣寒薌林得棲余腳踏玉兔金蟾蜍頭戴日
邊春杏朱口銜瑤草爲親茹蟠桃龍荀堆玉厨滿堂華燭紅氍

瑜六律餘鳴看鯉趨更繪霽椿丹桂圖

寒夜遣悶懷顏湘帆

崇衡

猛風裂瓦屋寒漏水凍縮野寂絕蟲蛰宵冷地燈燭捉搦指羅
攀躑躅脚踉蹌瘦骨蹙鱗皺孱肌綻皸瘃灼熱思沸羹煖焚想
暑溽安能招友朋消受寒吟福雖然苦掉頭猶藉樹幽獨孤悶
曷可遣煮茗蒸松竹有客闖然來啜飲飽所欲一椀已潤喉連
甌竟果腹尙談岐黃經茶荈清頭目詩癡笑賈島草聖嗤張旭
撮鼻泊山泉擁火抱筠簾嚴更正凜凜荒雞將喔喔豈遑聞瀾
語且自親被襪思多寐不成朝瞰在若木

溫謙山舍人叢桂軒向蓄一石高丈許璵璣傀偉湘帆

銘曰頑雲示余以詩作此和之

叢桂一軒花作龕中有頑石如瞿曇紫薇省郎退歸暇吟詩似

梵音喃喃石不能言首不領幽然默對殊深酣園林養閒日蕭
瑟匡廬九面何由探藥洲九曜散莫聚得一乃復遺其三荒山
古剎餘犂确土花凝碧蝕空嵌英州石山世罕匹乍入瑤圃生
貪饒力煩五丁恣攫取大斧斫斷皴雲藍行經峽束路詰屈更
倩神鬼同荷擔千金輦致作娛伴俯瞰池沼依松杉初疑蛟龍
角鬚鬚又訝熊虎牙巉巖或云石形太醜惡以弗適用相譏謔
主人嗜石竟成癖摩挲拂拭心所甘東坡仇池舊珍惜何如此
老形嶮崿欹斜兀傲勢陡出脈絡細繡非鐫鑿枝柯思竦出擔
角綠葩落蒂梢仍黏地穿蟻穴空窈窕飛烟縷縷抽春蠶儻然
雷雨紛追逐神凝欲化隨飛廉風馳電掣杳難去佇立悵望頭
鬢髮昔聞生公說佛法能令叢石將禪叅奇鍾造化孕精妙誰
云石不感至誠清風明月酌杯酒主人愛爾非癡惑石誠靈異

豈蠢蠢題署却怪顏湘帆他時米顛若鑄責覲然相對能無慙

題吳竹君

思綸

舟過鱣潭詩後

海風颭颭吹屋瓦中有江神騎白馬下馬跪進語嗛嗛一卷新
錄吳郎詩問而詩篇何所得答言昨白蛟龍國龍伯夜宴集百
靈忽傳此卷來重溟龍君讀罷掀髯笑再讀搖頭嘆奇妙何年
江上浣詩腸百千萬怪歸靈寢我能評詩不能寫世有徐君好
恠者爲予好語吳家兒莫更浪照溫嶠犀我得詩篇手亟戰深
山白晝駭虎變君已驅雲駕八荒我昔窺城攻一面莫謂書生
軀腹小堆濤沙浪神龍嶠別來歲月能幾何置身已在蓬壺島
一語殷勤謝江神擺弄雷電君勿嗔從來造化無閒畧多因上
界謫僊人

題湯雨生

貽汾

都尉劍人緣傳奇

十年韜匣氣如虹誰授飛騰劍術工共訝書生成俠客那知兒
女識英雄忘情太上還多感落魄歧途未是窮血濺弓衣酬友
誼青山何處住猿公

五夜悲歌擊唾壺少年膽氣太豪籠本來魯國真男子莫認高
陽舊酒徒鐵馬馳驅心未已天涯悵望眼終枯憑將一掬唐衢
淚寫向鰲綃化作珠